

雲在山房校印

吳郡通典

傅增湘署

昔江都汪容甫作廣陵通典用編年之體爲釋地之篇蒼萃條流苞綜鉅細合志於史此其先河實齋同聲嚶厥指奏孤文疇嗣曠世無聞繼之者則仁和吳伯宛昌綬有吳郡通典備橐吳自周秦訖今繇國而郡而州而軍而路而府爲東南勝壤士衡併其清嘉太冲歎爲煥炳九藪之一是曰具區閭闔之門取象天闕其間沿革興替政教風俗戶口財賦水利兵制上下數千年揆討故實難於廣陵伯宛是編例本汪書博以章義起姬代訖朱明都爲十卷敘錄具存梗臬可觀華郡之才抗手先輩僑吳之集延聲作家而伯宛以未遑研鍊有待攷補久藏函衍罕示朋儕歿後四年烏程張燕南元節爰爲校錄味雲同年思其遺佚刊入叢書余維伯宛耆學惜名命翰於慎茲雖初橐而首尾秩如鎔裁精絕毋穿羣籍成如己出鈔析纒疑識能獨斷可監古今得失之林允符志史合一之誼伯仲江都同風絜矩至其鄭重簡觚歆然自視所望後之讀者心知其意補闕削繇業紹撰鈔功資點勘九京可作庶冥契焉戊辰十月志盦王式通序

吳郡通典

吳郡通典叙錄

志乘之體資乎監戒山川能說可爲大夫自元會踐更割隸紛錯竹素晦翳金石刊闕徵文攷獻悌其難哉江都汪先生中於是有廣陵通典之作會合羣籍壹志接討上下百代端然相貫善夫先生之能自華其郡也今制布政司屬則有通志府有府志若州若縣又各有志鄙猥者無論矣即秉筆之士出以審慎期中經法不渙恣以阿俗而格於程式區畫門類必欲苞舉本末勢有不逮夫志與史無異也有紀傳表志之史以覈其實必有編年紀月之史以會其通竊嘗奉先生之書徑求之縱橫側求之而知其深有得於會通之微意也假令天下諸郡郡有通典上之史官箬錄乙部豈不愈於撫風雲月露之詞以璫屑爲可憇充卷葉而餘觀者此蓋志與史合之樞紐會稽章先生學誠文史通義反復言之而未洩其秘先生已於此發之惜其遺緒塵存賡續者尠吳爲古建國地秦并天下裂置郡縣自漢以來夙稱陬壤凡夫土風之清嘉民生之熙穰名公巨卿經濟之彪炳邦人君

吳郡通典

一

子行誼之超軼固有什百廣陵者東南大郡文章淵藪靈鍾秀毓氣象闐張不有成編胡詔來許爰以揮誦餘暇發筴陳書譔次吳郡故實都爲十卷悉用汪書之例茲事博大良非愚憊敢承特於江都文學私淑最深口沫手胼羅涉堂奧又慨廓於章先生書引申志史合一之義其書范氏吳郡志後王氏姑蘇志後二文尤今治通典所宜宣究也雖不能至能自得師循涂學步惴焉滋思管闕所及具錄後方

揚州舊域聲教遠絕至德三讓肇興句吳壽夢偁王遂通上國季札觀樂言游習禮荆蠻僻壤炳焉與三代同風矣采春秋三傳國語戰國策史記之文爲第一卷吳滅入越越滅入楚楚滅入秦更革之跡朝莫百變書闕有問靡得而詳綜其大凡附著於後吳越春秋越絕書文特瑰瑋事多歧舛或涉傳託弃置不登要在提挈綱領無埃汎濫以誇多也

漢世置郡蔚然首最文通武達雋異雲騫泊乎炎運告徂曹袁攬霸吳桓王以名

父之子崛起江東大帝龍興皇輿鼎足將軍之樹樵蘇弗侵餘韵流風及今未沫
輯漢三國吳事爲第二卷自漢以後斷代爲史方策具在探討有資外此諸書苟
足徵信隨文訂證庶期完備其有互異各下案語以待折衷一得之愚或冀少糾
志誤耳

晉始平吳俗承饒沃山川明麗人士縱萃自侯景倡亂閭閻塗炭六季紛更尤多
兵革羣雄擾攘形勢宜詳輯晉事爲第三卷宋齊梁陳隋事爲第四卷頗惜隋前
載籍如陸凱之吳先賢傳顧夷之吳地記多軼不傳未克網羅楸失也

南方地形竄下萬流所湊濤湖汎決觸地成川三江旣入震澤底定禹功偉矣前
代經營之跡多不見史至唐乃有可稽于嶼李素王仲舒諸公精意講求成功不
泯尤卓卓可紀者名標十望地號六雄設施之道於今爲近輯唐事爲第五卷

有唐末遺豪傑盡起割據偏隅盜名字者不可勝數吳越武肅王奄有浙東西之
地綏輯黎元三世五王不失臣節宣義父子節度中吳保障一方服疇食德亂離

吳郡通典

一一

之世此爲通典輯五代錢氏事迄於忠懿納土爲第六卷歐史世家論者謂出對
筆紀叙亦未該洽以錢儼吳越備史路振九國志吳任臣十國春秋訂之

趙宋承平民安作息垂髻之兒皆知翰墨戴白之老不識戈矛原田腴沃常獲豐
穰澤地沮洳浸以耕稼冠蓋之多人物之盛實天下之樂土也崇寧而後困於進
奉徽花策石鞭撻苛加未幾而北騎南侵蕩爲煨燼亦興衰之一會矣輯宋事爲
第七第八卷水利田賦之屬愈近則愈密意主尙論不厭求詳也

元初略定平江不勞兵力重圍洞達掩幟迎降蓋自信國勤王衆無鬪志鐵城紙
人之計固其宜矣張士誠起兵草澤抗拒天旌據守吳城未爲荼毒惜其溺於奢
靡上下嬉娛不能審幾歸順卒罹潰敗黃菜葉十七字之謠所由作也輯元事迄
於明祖戡亂爲第九卷

明祖怒吳民爲士誠固守盡括官田按私家簿籍爲額賦稅之重甲於天下洪武
弊政莫大於是建文暨滅永樂再增周况蒞事力加裁汰民氣甫甦不旋踵間而

稅使緹騎至矣又吳人所疾首痛心激成釁變者也輯明事爲第十卷
凡錄自泰伯以來至於明季數千年中閔綱大旨略可省覽吳中爲掌故海聞見
淺隘脫漏正多去取之間抉擇未當儻假研鍊俾勤攷補庶正亥豕之誤少異胥
史之鈔因源竟流心爲忻幸錄彙備纂伏冀鑒裁仁和吳昌綬

吳郡通典備彙一

泰伯仲雍皆周太王之子而王季歷之兄也季歷賢而有聖子昌太王欲立季歷以及昌於是泰伯仲雍乃奔荆蠻文身斷髮示不可用荆蠻義之從而歸之者千餘家號曰句吳泰伯卒弟仲雍立仲雍卒子季簡立季簡卒子叔達立叔達卒子周章立是時武王克殷求泰伯仲雍後得周章周章已君吳因而封之別封周章弟虞仲於周之北故夏墟十二世而晉滅虞虞滅二世而吳興自泰伯至壽夢十九世壽夢立而吳始益大稱王王壽夢二年周簡王之二年也楚之亡大夫申公巫臣怨楚將子反而奔晉自晉使吳壽夢說之乃通吳於晉教吳用兵乘車令其子狐庸爲吳行人吳始伐楚蠻夷屬於楚者吳盡取之吳於是通於上國壽夢有子四人長曰諸樊次餘祭次餘昧次季札季札賢壽夢欲立之季札讓不可於是乃立諸樊王諸樊元年既免喪讓位季札季札謝曰曹宣公之卒也諸侯與曹人不義曹君將立子臧子臧去之以成曹君札雖不材願附於子臧之義吳人固立

吳郡通典

一

季札季札棄其室而耕乃舍之封於延陵故號曰延陵季子諸樊卒有命授弟餘祭欲傳以次必致國於季札而止以稱先王壽夢之意且嘉季札之義兄弟皆欲致國令以漸至焉餘祭卒弟餘昧立餘昧卒欲授季札季札讓逃去於是吳人曰先王有命兄卒弟代立必致季子季子逃位則王餘昧後立今卒其子當代乃立餘昧子僚爲王王僚五年楚亡臣伍子胥來奔說王僚以伐楚之利公子光曰子胥父兄爲僂於楚欲自報其仇耳未見其利子胥知光有他志乃求勇士專諸見之光光喜客子胥子胥退耕於野以待專諸之事公子光者諸樊之子也常以爲吾父兄弟四人當傳至季子季子即不受國光父先立即不傳季子光當立陰納賢士欲以襲王僚八年七月使公子光伐楚拔居巢鍾離十二年冬楚平王卒十三年春吳欲因楚喪而伐之使公子蓋餘燭庸以兵圍楚之六澗使季札於晉以觀諸侯之變楚發兵絕吳後吳兵不得還於是公子光曰此時不可失也告專諸曰不索何獲我真王嗣當立吾欲求之季子雖至不吾廢也四月丙子光伏甲士

於窟室而謁王僚飲王使兵陳於道自王宮至光之家門階戶席皆王親也人夾持鉞公子光詳爲疾入於窟室專諸置匕首於炙魚之中以進食手匕首刺王僚鉞交於胸遂弑王僚公子光代立是爲闔廬以專諸子爲卿二公子在楚聞光弑王僚乃以兵降楚楚封之於舒季子至曰苟先君無廢祀民人無廢主社稷有奉乃吾君也吾誰敢怨乎非我生亂立者從之先王之道也哀死事生以待天命復命哭僚慕復位而待王闔廬元年舉伍子胥爲行人與謀國事闔廬曰吾國在東南僻遠之地險阻潤濕有江海之害內無守禦民無所依倉庫不設田疇不墾則將奈何於是子胥說以立城郭設守備實倉廩治兵庫闔廬乃委計於子胥使之相土嘗水築大城周四十七里小城周十里

地記所云大城周四十二里三七步小城八里二百六十步則顯有歧誤不知何所本也 陸門八以象天之八風水門八以象地之八

封是時楚誅伯州犂其孫伯嚭亡奔吳以爲大夫三年十二月伐楚拔舒殺亡將二公子謀欲入郢孫武曰民勞未可待之武齊人也以兵法見闔廬闔廬以爲將

吳郡通典

顯名諸侯武有力焉闔廬嘗謂之曰子之十三篇吾盡觀之矣四年秋再伐楚取六與濤五年夏始伐越敗之魯史墨曰不及四十年越其有吳乎越得歲而吳伐之必受其凶七年秋楚伐吳迎而擊之十月大敗楚軍於豫章取居巢九年十一月悉興師與唐蔡西伐楚闔廬弟夫槩以五千人襲楚兵楚兵五敗遂入郢十年春越聞闔廬之在郢國空乃伐吳吳使別兵擊越楚告急於秦秦遣兵救楚吳師敗夫槩見秦越交敗吳闔廬留楚不去遂亡歸自立爲吳王闔廬聞之引兵歸九月攻夫槩夫槩敗奔楚楚封之於堂谿十九年五月吳伐越越王句踐迎擊之敗吳於姑蘇靈姑浮以戈擊闔廬傷將指還卒於陔發卒十萬人大治冢桐棺三重瀕池六尺黃金珍玉爲鳧雁扁諸盤郢魚腸之劍在焉取土臨湖葬三日白虎踞其上名其山曰虎邱太子夫差立使人立於庭苟出入必謂己曰夫差而忘句踐之殺而父乎則對曰唯不敢忘

案此用左氏傳文也

王夫差元年以泊嚭爲太宰習戰射常以報越爲志二年伐越敗之夫椒句踐乃以甲楯五千保於會稽使

大夫種行成請委國爲臣妾夫差將許之伍子胥諫不聽退而告人曰越十年生衆而十年教訓二十年之外吳其爲沼乎大夫種乃以美女寶器因太宰嚭行成夫差喜子胥懼曰是棄吳也再諫不聽使子胥於齊子胥屬其子於齊鮑氏還報夫差夫差聞之大怒賜子胥屬鏹之劍以死將死曰樹吾墓上以梓令可爲器抉吾眼置之吳東門以觀越之入吳也夫差取子胥尸盛以鴟夷革浮之江中吳人憐之爲立祠於江上句踐自會稽歸苦身焦思與百姓同其勞拊循士卒思以雪會稽之恥十四年春夫差北會諸侯於黃池欲霸諸侯六月越發習流二千人教士四萬人君子六千人諸御千人伐吳敗太子友於姑熊夷乃率中軍泝江以襲吳入吳郢焚姑蘇徙大舟吳晉爭長未成邊釁乃至吳人告敗於王王惡其聞也或泄其語斬七人於幕下既盟晉別欲伐宋太宰嚭曰可勝而不能居也乃引兵歸國無太子內空王居外久士皆罷散於是乃使厚幣以與越平十八年三月句踐帥兵伐吳夾水而陳越爲左右句卒使夜或左或右鼓譟而進吳師分以禦

吳郡通典

三

之越以三軍潛涉當吳中軍而鼓之吳師大亂敗於笠澤二十年春越侵楚以誤吳二十一年十一月遂圍吳二十三年十一月越敗吳棲吳王於姑蘇之山吳使公孫雄請成句踐憐之使人謂夫差曰吾置王而東百家夫差曰孤老矣不能事君王也吾悔不用子胥之言自令陷此遂自刎死句踐乃葬夫差而誅太宰嚭會諸侯於徐州周元王使人致胙命爲伯於是以淮上地與楚歸吳所侵地於宋與魯泗東方百里越兵橫行於江淮東諸侯畢賀號稱霸王越之賢大夫曰范蠡佐句踐謀吳事既滅吳范蠡辭句踐去乘輕舟以浮於五湖莫知所終句踐六傳至王無疆王無疆二十三年楚威王伐越大敗之殺王無疆盡取故吳地至浙江楚考烈王元年以黃歇爲相封爲春申君賜淮北地十二縣十五年虞卿謂春申君曰吾聞之春秋於安思危危則慮安今楚王春秋高矣而君之封地不可不早定也爲主君慮封莫如遠楚春申君因言於楚王曰淮北地邊齊其事急請以爲郡便因并獻淮北十二縣請封於江東考烈王許之春申君因城故吳墟以爲都邑

宮室極盛使其子爲假君留吳二十二年春申君就封於吳行相事二十五年考烈王薨李園殺春申君使吏盡捕誅春申君之家秦始皇帝二十四年王翦蒙武虜楚王負芻以其地置楚郡二十五年悉定楚江南地降百越之君置會稽郡治於吳二十六年分天下爲三十六郡郡置守尉監於是定楚地爲九江鄣會稽三郡三十七年十月始皇帝出游浮江下觀藉柯渡海渚過丹陽至錢唐臨浙江上會稽望於南海還過吳從江乘渡是時項梁殺人與從子籍避仇吳中吳中賢士大夫皆出梁下每吳中有大繇役及喪梁常爲主辦陰以兵法部勒賓客子弟始皇帝東游梁與籍俱觀籍曰彼可取而代也梁掩其口曰毋妄言族矣梁以此奇籍籍年二十四長八尺餘力能扛鼎才氣過人雖吳中子弟皆已憚籍矣二世元年陳涉等起大澤中會稽守殷通欲發兵召籍入籍擊斬守梁佩其印綬一府中皆懼伏莫敢起於是梁爲會稽守籍爲裨將遂舉吳中兵徇下縣

吳郡通典備案二

漢高帝五年灌嬰渡江破吳郡長吳下得吳守遂定吳豫章會稽地六年正月立

從父賈為荆王王故東陽郡鄣郡吳郡五十三縣案府志引灌嬰破吳郡長吳下改郡字作縣

然故史記漢書灌嬰傳皆作吳郡下文又云吳守吳既非郡安得有守劉文世漢諸侯國城上則曰吳郡即

會稽郡吳守即會稽守竊意吳為郡治守所親雖有可借作本郡通稱者故史漢於荆王封國一節亦以會稽

高吳郡也此文疏證當以劉志為準不必從前志改字之說都廣陵十一年七月淮南王黥布反

東擊荆賈與戰弗勝走富陵為布軍所殺帝自將誅布忠吳會稽輕悍無壯王以

頃之還過沛沼曰吳古之建國也日者荆王兼有其地今死無後朕欲復立吳王

其議可者長沙王等言沛侯濞重厚請立為吳王於是吳地更屬濞孝景帝前三

年吳王濞反國除四年六月分廣陵以封江都王非而會稽乃復為郡置會稽太

守治於吳曲阿烏傷毗陵餘暨陽羨諸暨無錫山陰丹徒餘姚婁上虞海鹽剡山

拳大末烏程句章餘杭鄞錢唐鄞富春治回浦二十六縣案朱長文云郡屬縣雖記曰此

吳郡通典

五

帝建元元年十月詔舉賢良方正直言極諫之士親策問以古今治道對者百餘

人帝善嚴助對擢助為中大夫獨見任用助忌之子也三年閩越舉兵圍東甌告

急帝以新即位不欲出虎符發兵郡國遣助以節發兵會稽會稽守欲距法不為

發助乃斬一司馬以諭意指遂發兵浮海救東甌未至閩越引兵罷後三歲閩越

復興兵擊南越南越守天子約不敢擅發兵而上書以聞帝多其義大發兵救之

淮南王安上書諫是時漢兵遂出踰嶺適會閩越王弟餘善殺王以降漢兵罷帝

嘉淮南之意美將卒之功令助諭意風指於南越越遣太子隨助入侍助還又諭

淮南王告王越事與淮南相結而還帝大悅助既貴幸乃薦朱買臣亦為中大夫

帝從容問助居鄉里時助曰家貧為友皆富人所辱帝問所欲對願為會稽太守

助為會稽數年不聞問帝賜書曰君厭承明之廬勞侍從之事懷故土出為郡吏

會稽東接於海南近諸越北枕大江閩者濶焉久不聞問具以春秋對助恐上書

謝願奉三年計最時東越數反覆買臣言故東越王居保泉山一人守險千人不

郡之餘分并之跡古今通異然不詳其如何并則不能紀其如何分今悉以統郡為準即如一舉而并於武

得上今聞更徙處南行去泉山五百里居大澤中今發兵浮海直指泉山列兵席卷南行可破滅也帝拜買臣會稽太守謂曰富貴不歸故鄉如衣繡夜行今子何如買臣頓首謝懷會稽太守章步歸郡邸長安廐吏乘駟馬車來迎會稽聞太守且至發民除道縣長吏並送迎車百餘乘一時榮之既至郡治樓船備糧食水戰具居歲餘受詔將兵與橫海將軍韓說等俱擊破東越同時陸烈爲吳令多惠績既卒吳人思之迎其喪葬於胥屏亭子孫遂爲吳縣人吳陸氏所自出也元符四年冬有司言關東貧民徙會稽等郡凡七十二萬五千口縣官衣食振業用度不足請收銀錫造白金皮幣以足用元封五年置十三州刺史會稽屬揚州刺史平帝元始二年會稽郡戶二十二萬三千三十八口百三萬二千六百四十四是時王莽益專恣梅福爲南昌尉知莽必篡漢祚一朝棄妻子去不知所往其後人有見福於會稽者變姓名爲吳市門卒云王莽始建國元年改郡太守曰大尹都尉曰大尉縣令長曰宰改吳曰泰德其他縣並更名淮陽王更始元年以任延爲大司馬

吳郡通典

六

屬拜會稽都尉延年十二爲諸生顯名太學中號爲任聖童至是年十九迎官驚其壯及到靜泊無爲惟先遣饋禮祠延陵季子時天下新定道路未通避亂江南者皆未還中土會稽頗稱多士延到皆聘請高行待以師友之禮掾吏貧者輒分俸祿以振給之省諸卒令耕公田以周窮急每時行縣輒使慰勉孝子就餐飯吳有龍邱萇者隱居太末志不降辱王莽時四輔三公連辟不到掾吏白請召之延曰龍邱先生躬德履義有原憲伯夷之節都尉掃灑其門猶懼辱焉召之不可遣功曹奉謁修書記致醫藥吏使相望於道積一歲萇乃乘輦詣府門願得先死備錄延辭讓再三遂署議曹祭酒旋病卒延自臨殯不朝三日是以郡中賢士大夫爭往宦焉世祖建武初賊張子林等數百人作亂彭脩爲本郡從事郡言州請脩守吳令脩與太守俱出討賊賊望見車馬交射之飛矢兩集脩障扞太守爲流矢所中死太守得全賊素聞脩恩信即殺弩中脩者餘悉降散言曰自爲彭君故降不爲太守服也

案後漢書彭脩傳張子林作亂無年月脩脫鎮難意非是時意爲上脩以傳之當在建武初也

脩初仕郡爲功曹時西部都

尉宰鼂行太守事以微過收吳縣獄吏將殺之主簿鍾離意爭諫甚切鼂怒使收縛意欲案之掾史莫敢諫脩排閣直入拜於庭曰明府發雷霆於主簿請聞其過鼂曰受教三日初不奉行廢命不忠豈非過耶脩因拜曰昔任座而折文侯朱雲攀毀欄檻自非賢君焉得忠臣今慶明府爲賢君主簿爲忠臣鼂遂原意罰貲獄吏罪十四年會稽大疫死者萬數意任縣事獨身自隱親經給醫藥所部多蒙全濟二十九年以第五倫爲會稽太守倫雖爲二千石躬自斬芻養馬妻執炊爨受俸裁留一月糧餘皆賤買與民之貧羸者會稽俗多淫祀好卜筮民常以牛祭神百姓財產以之困匱其自食牛肉而不以薦祠者發病且死先爲牛鳴前後郡將莫敢禁倫到官移書屬縣曉告百姓其巫祝有依託鬼神詐怖愚民皆案論之有妄屠牛者吏輒行罰民初恐懼或祝詛妄言倫案之愈急後遂斷絕百姓以安明帝永平五年倫坐法徵老小攀車叩馬啼呼相隨日裁行數里不得前倫乃僞止亭舍陰乘船去衆知復追之及詣廷尉吏民上書守闕者數千人詔公車爲會稽

吳郡通典

七

太守上書者勿復受會稽幸廷尉錄囚徒得免十三年尹興爲會稽太守時歲荒民飢困興使戶曹史陸續於都亭賦民餽粥續悉簡閱其民訊以名氏事畢興問所食幾何續因口說六百餘人皆分別姓名無有差謬興異之十四年楚王英至丹陽自親時窮治楚獄牽引甚衆英嘗陰疏天下善士帝得其錄有尹興名乃徵興詣廷尉獄續與主簿梁宏功曹史駟勳及掾史五百餘人詣洛陽詔獄就考諸吏不堪痛楚死者太半惟續宏勳掠考五毒飢肉消爛終無異辭續母遠至京師覘候消息獄事持急無緣與續相聞母但作饋食付門卒以進之續雖見考苦毒而辭色慷慨未嘗易容惟對食悲泣不能自勝使者怪而問其故續曰母來不得相見故泣耳問何以知之續曰母截肉未嘗不方斷意以寸爲度是以知之使者問諸謁舍續母果來於是陰嘉之上書說續行狀帝即赦興等事還鄉里禁錮終身和帝永元中吳大旱民物顛頓時何敞隱居太守慶宏遣戶曹掾致謁奉印綬請守無錫敞不受退歎曰郡界有災安得懷道因跋涉之縣駐明星屋中蜂蝗消

死敞旋遁去

案禮漢五行志永元中書者有二年十五年書始者有安帝永初六年四月會稽

大疫遣光祿大夫將太醫循行疾病賜棺木除出租口賦順帝永建四年分浙江

東爲會稽郡西爲吳郡

案三國志注引會稽典錄朱育對漢與曰永建四年調府君上書浙江之北以

陽美周嘉上書以縣遠赴會至經求得分置遂以浙江西爲吳以東爲會稽郡與地記曰永建四年山陰縣人嚴
重徵道於帝請分江置兩浙謂司望王嬰封從錢唐江中分向東爲會稽郡向西爲吳郡三書互與府志於職
官列劉府君名不可致仍共蒸稱所揭是矣而雜記中引吳郡志用鄒大使說未
加詳證致有矛盾今從後漢帝紀不歸上書人名各從原書條列於下以備攷

領吳海鹽烏程餘杭毗

陵丹徒曲阿由拳安富春陽羨無錫婁十三城仍爲揚州刺史部陽嘉元年三月

揚州六郡妖賊章河等寇四十九縣殺傷長吏二年二月詔以吳郡飢荒貸人種

糧永和二年八月庚子熒惑犯南斗斗爲吳三年五月吳郡太守行丞事羊珍與

越兵弟葉吏民吳銅等二百餘人起兵反殺吏民燒官亭民舍攻太守府太守王

衡距守吏兵格殺珍等五年吳郡戶十六萬四千一百六十四口七十萬七百八

十二桓帝永興二年吳郡守麋豹始建泰伯廟於閭門外豹嘗出行屬城問功曹

唐景風俗所尚景曰處家無不孝之子立廟無不忠之臣文爲儒宗武爲將帥時

吳郡通典

八

人以爲善言靈帝熹平三年吳郡司馬富春孫堅召募精勇得千餘人不助州郡

討許生破之獻帝建安元年孫策逐吳郡太守許貢以朱治爲太守初孫堅娶錢

唐吳氏有四男策權翊匡策少時已結交知名舒人周瑜聞策聲問因來造焉推

結分好勸策徙居舒堅卒策年十七當嗣侯以讓弟匡還葬曲阿已乃渡江居江

都廣結豪俊有復讐之志至壽春詣袁術術貴異之然未肯還其父兵詔策曰孤

始用貴舅爲丹陽太守賢從伯陽爲都尉彼精兵之地可還依召募策乃載母徙

曲阿與呂範孫河俱就吳景因緣召募得數百人爲涇縣大帥祖郎所襲幾殆復

往見術術乃以堅餘兵千餘人還策表拜懷義校尉許以爲九江太守已而用陳

紀又許以廬江太守復用劉勳不果策由是失望丹陽朱治嘗爲孫堅校尉勸策

歸定江東策言於術術知策恨已而謂策未必能定許之拜折衝校尉以行次漂

陽周瑜以兵來迎攻橫江拔之迤邐南下治從錢唐欲進到吳許貢拒之於山拳

治與戰大敗之時山賊嚴白虎有衆萬餘在吳郡南阻山屯聚貢往依之治遂入

郡領太守事策引兵渡浙江會稽太守王朗逆戰敗之朗詣策降二年曹操遣議郎王誦以詔書拜策爲騎都尉襲爵烏程侯領會稽太守使與呂布等共討袁紹策欲得將軍號以自重誦即承制假策明漢將軍三年策遣張紘獻方物曹操欲撫納之表策爲討逆將軍封吳侯四年策引兵攻鄒佗錢銅王晟等初盛憲爲吳郡太守舉高岱孝廉許貢來領郡岱將憲避難於營帥許昭家佗等各聚衆萬餘或數千人不附策至是悉破之策母吳夫人曰晟與汝父有升堂見妻之分今其諸子兄弟皆已梟夷獨餘一老翁何足復憚乎乃舍之餘咸族誅遂進攻嚴白虎白虎兵敗奔餘杭投許昭衆請擊昭策曰許昭有義於舊君有誠於故友此丈夫之志也禁勿擊方策敗嚴白虎兵殺許貢貢小子與客潛民間欲爲貢復讐五年四月策西擊黃祖軍還次丹徒待運糧軍騎出卒與客遇客三人舉弓射策中頰創甚召張昭等謂曰中國方亂以吳越之衆三江之固足以觀成敗公等善相吾弟呼權佩以印綬謂曰舉江東之衆決機於兩陳之間與天下爭衡卿不如我舉

吳郡通典

九

賢任能各盡其心以保江東我不如卿丙午策卒年二十六堅策墓並在盤門外三里大帝建國追尊曰高陵晉元康中吳令謝詢請爲孫氏置守冢人張浚作表曰吳僞武烈皇帝遭漢室之弱值亂臣之彊首倡義兵先衆犯難破董卓於陽人濟神器於甄井威震羣牧名顯往朝桓王才武弱冠承業招百越之士奮鷹揚之勢西赴許都將迎幼主雖元勳未終然至忠已著家積義勇之基世傳扶危之業進爲徇漢之臣退爲開吳之主而蒸嘗絕於三葉園陵殘於薪采臣竊悼之二君私奴多在墓側今爲平民乞差五人蠲其徭役使四時修護頽毀掃除壘壘永以爲常有詔從之

案保氏未有國之先世居於吳吳夫人拾宅爲道元寺因可證也二君卒葬吳縣於理馬園觀澤南高陵在蘇州城東吳吳地記唐人之筆或有依託韓吳志有遷葬曲阿一語丹陽曲阿縣遷於吳也不及詳載耳此說最當今於前志遺引仍依吳志原文而祀暨權墓所備錄謝表以示徵信二君

大節亦在也魏文帝黃初三年十月孫權建元黃武明帝太和元年孫權稱皇帝都建

業改元黃龍初興平中吳中童謠曰黃金車班蘭耳闔昌門出天子至是乃驗九月徵陸遜輔太子登掌武昌留事遜初仕權爲定威校尉權以兄策女配遜數訪

世務襄贊戎幕歷輔國將軍荊州牧江陵侯至是拜上大將軍右都護并掌荊州豫章三郡事董督軍國後代顧雍爲丞相弟瑁子抗並有功於吳抗子晏景機雲著稱晉世爲吳中巨望族人績爲鬱林太守加偏將軍給兵二千人績志在儒雅非其志也雖有軍事著述不廢作渾天圖注易釋元並傳於時豫自知亡日乃爲辭曰有漢志吳郡陸績幼敦詩書長玩禮易受命南征遭疾遇厄遭命不幸嗚呼悲隔又曰從今已去六十年之外車同軌書同文恨不及見也年三十一卒

德蒙傳陸氏在姑蘇其門有五百餘人結爲鬱林守能無裝舟輕不可越海取石爲人帶其廉鬱林石世保其居云此事古今體稱而吳志本傳不載要注多紀執聞亦未及之不識唐書何所本績自爲辭有受命南征遭疾遇厄之語似卒於任所傳無異歸之文也此石從來始未可信附識依攷績於鬱林所生女名曰鬱生適張溫弟白姚信表稱

之曰臣見故鬱林太守陸績女子鬱生少履貞特之行幼立匪石之節年始十三適同郡張白侍廟三月婦禮未卒白遭罹家禍遷死異郡鬱生抗聲昭節義形於色冠蓋交橫誓而不許奉白姊妹嶮巖之中蹈履水火志懷霜雪義心固於金石體信貫於神明送終以禮邦士慕則乞蒙聖朝斟酌前訓上開天聰下垂坤厚褒

吳郡通典

十

鬱生以義姑之號以厲兩髦之節則皇風穆暢士女改視矣大帝太元元年八月大風江海涌溢平地深入尺吳高陵松柏盡拔石碑蹀動郡城南門飛落景帝永安中賀邵爲吳郡太守初不出門吳中諸強族輕之乃題府門曰會稽雞不能啼邵聞故出行至門反顧索筆足之曰不可啼殺吳兒於是至諸屯邸檢校顧陸役使官兵及藏逋亡悉以事言上罪者甚衆陸抗時爲江陵都督故下請於烏程侯皓然後得釋吳主皓甘露元年七月送景帝四子於吳小城尋復追殺大者二人寶鼎元年十月詔曰古者分七建國所以褒賞賢能廣樹藩屏秦毀五等爲三十六郡漢室初興闔立乃至百五因事制宜蓋無常數也今吳郡陽羨永安餘杭臨水及丹陽故鄣安吉原鄉於潛諸縣地勢水流之便悉注烏程既宜立郡以鎮山越且以藩衛明陵奉承大祭不亦可乎其亟分此九縣爲吳興郡治烏程於是吳郡領吳婁嘉興富春建德桐廬新昌鹽官新城十縣天冊元年吳郡言掘地得銀長一尺廣三分刻上有年月字於是大赦改年天璽元年吳郡言臨平湖自漢末

草穢壅塞今更開通長老相傳此湖塞天下亂此湖開天下平又於湖邊得石函
中有小石青白色長四寸廣二寸餘刻上作皇帝字於是大赦改年

吳郡通典備彙三

晉武帝咸寧六年三月平吳改元太康以司隸所統郡置司州二年分丹徒曲阿延陵毗陵暨陽無錫爲毗陵郡其後分吳縣置海虞於是吳郡領吳嘉興海鹽鹽官錢唐富陽建德壽昌海虞婁十一縣戶二萬五千與吳興丹陽號曰三吳大康中蔡洪爲本州從事嘗侍揚州刺史周浚坐言及吳士令條列名狀洪爲書稱疏所知曰吳展字士季下邳人忠足矯非信可結神才堪幹世仕吳爲廣州刺史吳郡太守吳平還下邳閉門自守不交賓客誠聖王之老成明時之儒父也朱誕字永長吳郡人體履清和黃中通理吳朝舉賢良累遷議郎今歸在家誠理物之至德清選之高望也嚴隱字仲弼吳郡人稟氣清純思度淵偉吳朝舉賢良宛陵令吳平去職九臯之鳴鶴空谷之白駒也張暢字威伯吳郡人稟性堅明志行清朗居磨涅之中無淄磷之損歲寒松柏幽夜之逸光也惠帝永甯元年齊王冏辟吳郡張翰爲東曹掾前廷尉正顧榮爲主簿冏擅權驕恣咸懼及禍翰謂榮曰天下

吳郡通典

十一

紛紛禍難未已夫有四海之名者求退良難吾本山林間人無望於時子善以明防前以智慮後榮愴然執其手曰吾亦與子採南山蕨飲三江水耳翰因見秋風起乃思吳江菰菜蓴羹鱸魚膾曰人生貴適志何能縶宦數千里以要名爵乎遂命駕而歸俄而冏敗人皆謂翰見幾榮雍之孫也少朗俊機警風穎標徹故酣飲不省府事以自韜晦長史葛旗白冏謂榮廢職徙中書侍郎後仕元帝朝以功名終大安二年十月成都王穎執平原內史陸機及機弟右司馬雲平東祭酒軌殺之機兄弟少有盛名文章冠世伏膺儒術非禮不動抗卒領父兵爲牙門將吳滅退居舊里閉門勤學積十年太康末入洛楊駿辟爲祭酒趙王倫將篡位以爲中書郎倫誅齊王冏收機付廷尉穎及吳王晏並救理之機感穎全濟之恩或以中國多故勸之還吳機負其才望志匡世難未能從也及穎起兵假機後將軍督王粹牽秀等諸軍二十萬雲著南征賦以美其事機羈旅宦頓居羣士之右多不厭服旣屢戰失利死散過半初宦人孟玖穎所嬖幸乘寵豫權雲數言其短穎不

能納玖又從而毀之是役也玖弟超亦領衆配機不奉軍令機繩之以法超宣言曰陸機將反牽秀等譖機於穎以爲持兩端玖復搆之於內穎信之使秀密收機參軍王新諫曰今日之舉強弱異勢庸人猶知必克况機之明達乎但機吳人殿下用之太過北土舊將皆疾之耳穎不從機聞秀至釋戎服著白帽與秀相見神色自若謂秀曰自吳朝傾覆吾兄弟宗族蒙國重恩入侍帷幄出剖符竹成都命吾以重任辭不獲已今日受誅豈非命也因與穎牋詞甚悽惻既而歎曰華亭鶴唳可復聞乎秀遂殺之并收雲軌並伏法是日昏霧晝合大風折木議者以爲陸氏之冤孫惠與朱誕書曰不意三陸相携聞朝一旦湮滅道業淪喪痛酷之深荼毒難言國喪雋望悲豈一人後東海王越討穎移檄天下亦以機雲兄弟枉害罪狀穎云元帝大興元年四月加王導驃騎大將軍開府儀同三司導遣八部從事行揚州郡國還同時俱見諸從事各言二千石官長得失獨顧和無言導問之和曰明公作輔甯使漏網吞舟何緣采聽風聞以察察爲政耶導稱善和榮之族子

吳郡通典

十三

也時顏含以侍中除吳郡太守導問卿今蒞名郡政將何先答曰王師歲動編戶虛耗南北權豪競招游食國敝家豐執事之憂且當徵之勢門使反田桑數年之間欲令戶給人足如其禮樂候之明宰含所歷簡而有恩明而能斷然以威馭下導歎曰顏公在事吳人歛手矣未之郡復爲侍中二年六月吳郡米廩無故自壞是歲無麥禾大飢死者千數太守鄧攸表請振貸未報輒開倉救之爲臺所劾有詔原之攸在郡刑政清明俸祿無所受惟飲吳水而已比去官百姓留牽攸船不得進乃小停夜中發去吳人歌云統如打五鼓雞鳴天欲曙鄧侯挽不來謝令推不去百姓詣臺乞留一歲不許三年四月吳郡地震永昌元年四月王敦將沈充陷吳吳國內史張茂及其二子死之案成帝咸和元年始立吳國此時吳尚爲郡不得有內茂妻陸氏傾家產帥部曲爲先登以討沈充報其夫仇及充敗陸氏詣闕上書爲茂謝不克之責詔曰茂夫妻忠誠舉門義烈可贈茂太僕成帝咸和元年十月己巳封皇弟岳爲吳王改吳郡爲吳國置內史行太守事仍統於揚州二年十二月丙寅

徙封皇弟岳爲琅郡王三年二月蘇峻遣兵攻吳國內史庾冰冰不能禦棄郡奔會稽至浙江峻購之急吳鈴下卒引冰入船以遽蔭覆之吟嘯鼓柁泝流而去每逢邏所輒以杖叩船曰何處覓庾冰庾冰正在此人以爲醉不疑之水僅免峻以侍中蔡謨爲吳國內史初峻東征與吏部郎陸邁俱將至吳密勅左右令入閭門放火以示威邁知其意謂峻曰吳治平未久必將有亂若爲亂階請從我家始峻遂止五月會稽內史王舒以冰行奮武將軍移告屬縣以吳王師處變爲軍司御史中丞謝藻行龍驤將軍監前鋒征討軍事率衆一萬與吳興太守虞潭前義興太守顧衆護軍顧颺及蔡謨等並起兵應之渡浙江於御亭築壘舒率衆次郡之西江爲冰藻後繼冰等遣前鋒進據無錫遇賊將張健等數千人交戰大敗奔還御亭復自相驚擾冰等退還錢唐藻守嘉興賊遂入吳燒府舍掠諸縣所在塗地舒以輕進奔敗斬二軍主者免冰颺督護以白衣行事更以顧衆督護吳晉陵軍健等方據吳城衆自海虞由婁縣東倉與賊別率交戰破之義軍又集屯烏菴亭

吳郡通典

十四

不敢進時暴雨大水賊管商乘船旁出襲潭及衆潭等奔敗潭還保吳興衆退守錢唐舒留謝藻守錢唐使衆颺守紫壁於是賊轉攻吳興潭軍復退賊掠東遷餘杭武康諸縣舒遣子允之與徐遜陳儒朱燾以精銳三徑邀賊於武康破之進兵助助潭韓晃旣破宣城轉入故鄣長城允之遣朱燾等擊走之是時臨海新安諸山縣並反應賊舒悉平之旣而晃等南走允之追躡於長塘湖又敗之賊平五年五月趙石勒將劉徵帥衆數千浮海抄東南郡縣殺南沙都尉許儒六年正月劉徵復寇婁縣掠武進以司徒郗鑒都督吳國諸軍事擊郤之七年正月石勒將韓雍寇南沙及海虞九年五月吳縣吳雄家有死榆樹因風雨起生時康帝爲吳王雖改封瑯琊而猶食吳郡爲邑是帝起正體饗國之象也康帝建元元年七月吳郡災穆帝永和五年十二月以吳國內史荀羨爲使持節兼徐兗二州揚州之晉陵諸軍事徐州刺史時年二十八中興方伯未有如羨之少者海西公太和六年六月吳郡大水稻稼蕩沒黎庶飢殍十一月己酉桓温宣崇德太后令廢帝爲東

海王迎會稽王昴即位改元咸安簡文帝咸安元年十二月大司馬溫奏放廢人之屏之以遠不可以臨黎元東海王宜依昌邑故事築第吳郡太后詔曰使爲庶人情有不忍可特封王溫又奏可封海西縣侯庚寅封海西縣公食邑四千戶

書海西公紀封海西縣公在二年正月簡文帝紀則在元年十二月二年四月徙居吳縣西柴里勅通鑑從簡文紀改是月有戊子庚寅乃其後二日自此年爲合也

吳國內史刁彝防衛又遣御史顧允監察之十一月彭城妖賊盧悚遣弟子許龍晨到海西公門稱太后密詔奉迎復興公初欲從之納保母諫而止龍曰大事垂集焉用兒女子言乎公曰我得罪於此幸蒙寬宥豈敢妄動哉且太后有詔便應官屬來何獨使汝也汝必爲亂因此左右縛之龍懼而走公知天命不可再深慮橫禍乃杜塞聰明無思無慮終日酣暢耽於內寵有子不育庶保天年時人憐之爲作歌焉朝廷知其安於屈辱不復爲慮是歲三吳大旱民多餓死孝武帝嘗康二年詔三吳遭水之縣尤甚者全除一年租布其次聽除半年受振貸者即以賜之太元十一年十月甲申海西公薨於吳時年四十五以庾后合葬吳陵十五年

吳郡通典

十五

九月丁未以吳郡太守王珣爲尚書僕射珣在郡爲士庶所悅有別館在虎邱山撰山銘云虎邱先名海涌山又云山大勢四面周嶺南則是山逕兩面壁立交林上合升降窈窕亦不卒至戴逵潛詣之與珣游處積旬及是上疏請召逵爲國子祭酒逵名益顯安帝隆安元年前司徒長史王廞以吳郡反廞以母喪居吳王恭舉兵討王國寶假廞建武將軍吳國內史令起軍助爲聲援廞即墨經合衆誅殺異己者仍遣前吳國內史虞嘯父等入吳興聚兵輕俠赴者萬計廞自謂義兵一動勢必未甯可乘間以取富貴未幾國寶死恭罷兵符廞去職反喪服因大怒使長子泰迴兵伐恭恭遣司馬劉牢之帥五千人擊泰斬之又與廞戰於曲阿廞衆潰奔走不知所在少子華以不知廞存亡憂毀布衣蔬食後從兄謚言其死所華始發喪入仕方廞之起兵也以其女爲貞烈將軍悉以女人爲官屬郡人顧琛母孔氏爲司馬其後東土飢荒人相食孔氏散家糧以振邑里得活者甚衆生子皆以孔爲名焉三年十一月孫恩陷會稽吳國內史桓謙委官遁恩世奉五斗米道

叔父泰見天下兵起以爲晉祚將終乃扇動百姓私集徒衆三吳士庶多從會稽
內史謝輔發其謀誅之恩逃於海聚合亡命得百餘人志欲復仇及元顯縱暴吳
會不安恩因其騷動自海襲會稽殺內史王凝之有衆數萬吳郡陸瓌等殺長吏
以應之旬日之中衆數十萬恩據會稽自號征東將軍號其黨曰長生人吳會承
平日久民不知兵又無器械故所在多被破亡殺戮之慘徧於諸郡初吳郡治下
狗恆夜吠聚高橋上人家狗有限而吠聲甚衆或有夜覘視之云一狗假有兩三
頭皆前向亂吠未幾恩果作亂四年十一月吳國內史袁山松築滬瀆壘緣海備
恩五年五月恩復入浹口甯朔將軍高雅之敗績鎮北將軍劉牢之進擊恩還於
海轉寇滬瀆山松被害死者數千人仍浮海向京口劉裕屢敗之又破之於滬瀆
元興元年三月恩復寇臨海爲臨海太守辛景所敗赴海自沈其亂乃平義熙十
一年京都所在大行火災吳界尤甚火防甚峻猶自不絕王宏時爲吳郡晝在廳
事見天上有一赤物下狀如信幡遙集路南人家屋上火即大發宏知爲天災故

吳郡通典

十六

不罪火主

吳郡通典備彙四

宋廢帝景平二月五月乙酉徐羨之等稱皇太后令數帝過惡廢帝爲營陽王遷於吳王至吳居金昌亭六月癸丑羨之等使邢安泰就弑之王多勇力不即受制突走出閭門追者以門關路而弑之時年十九傅亮率行臺百官奉法駕迎宜都王義隆於江陵纂承大統祠部尙書蔡廓至尋陽遇疾不堪前亮與之別廓曰營陽在吳宜厚加供奉一旦不幸卿諸人有弑主之名欲立於世將可得耶時亮已與羨之議害營陽王乃馳信止之不及羨之大怒曰與人共計議如何旋背即賣惡於人耶文帝元嘉十七年九月帝以彭城王義康嫌隙已著將成禍亂十月戊申收劉湛付廷尉就獄誅之并遣沈慶之收其黨劉斌等八人時斌爲吳郡守郡堂屋西頭鴟尾無故落地治之未畢東頭鴟尾復落頃之伏誅劉損爲吳郡守至閭門便入泰伯廟廟室頽毀垣牆不修損愴然曰清塵尙可彷彿衡宇一何摧頽即令修葺是時三吳水潦穀貴民饑彭城王義康立議以東土災荒民稠穀踴富

吳郡通典

十七

商蓄米日成其價宜班下所在隱其虛實令積蓄之家聽留一年儲餘者勒使糶貸爲制平價又沿淮歲豐令三吳饑民即以貸給使強壯轉運以贍老弱

作元嘉中宋書亦同以彭城王事攷之當元十七年以前全書凡年月缺失者附書每編之末今明其例於此 孝武帝孝建二年三吳饑詔所在振貸

大明二年六月白燕產於吳郡城內太守王翼之以獻三年二月乙卯改揚州之丹陽淮南宣城吳郡吳興義興六郡爲王畿八年十二月壬辰仍以王畿諸郡爲揚州大明中東方諸郡連歲旱災米一升錢數百餓死者什六七先是七年春太湖旁忽多鼠其夏水至悉化爲鯉魚民人一日取轉得三五十斛爲饑荒之兆順帝昇明元年十二月蕭道成以吳郡太守劉暹據郡不從執政令張瓌攻斬之是時暹兄秉潛有異圖暹在郡恒相影響聚衆三千人治攻具道成密遣殿中將軍卞白龍令瓌取暹瓌永之子也諸張世有豪氣瓌宅中常有父時舊部曲數百暹召瓌瓌僞受旨與叔忽領兵十八人入郡與防郡隊主彊弩將軍郭羅雲直入齋中齊取暹踰窗而走瓌部曲顧憲子手斬之郡中莫敢動道成聞之以告瓌仲

父冲冲曰環以百口一擲出手得盧矣道成即以環爲吳郡太守宋世吳郡領吳嘉興海鹽鹽官錢唐富陽新城桐廬建德壽昌海虞婁十二縣戶五萬四百八十八口四十二萬四千八百一十二齊高祖建元元年以張岱爲吳郡太守帝知岱歷任清直至郡未幾手勅曰大郡任重乃未欲回換但總戎務殷宜須望實今用卿爲護軍加給事中岱拜竟詔即家爲府時以爲榮安陸昭王緬繼岱爲守政有能名竟陵王子良與之書曰竊承下風數十年來姑蘇未有此政九月詔二吳義興三郡遭水減今年田租二年六月詔昔歲水旱曲赦丹陽二吳義興遭水尤劇之縣明帝建武二年吳郡兩傷稼自是三年四年每秋七八月輒大風發屋折木殺人永泰元年四月帝疾甚防疑大司馬王敬則以光祿大夫張瓌爲平東將軍吳郡太守置兵佐以密防敬則中外傳言當有異處分敬則聞之竊曰東今有誰只是欲平我耳東亦何易可平吾終不受糞羹謂鳩也及敬則反率實甲萬人過浙江瓌遣精兵三千拒敬則於松江聞軍鼓聲一時散走瓌棄郡逃民間爲有司

吳郡通典

十八

所奏免官削爵東昏侯永元三年吳郡夜天開黃色明照須臾有物絳色如小變漸大如倉廩聲隆隆如雷墜太湖中野雉皆雊梁武帝天監六年分婁縣置信義郡中大通二年春以吳郡屢遭水災不熟議漕大瀆以瀉浙江詔遣王奕假節發吳吳興信義三郡人丁就役昭明太子上疏請權停帝優詔諭焉太清三年三月癸未侯景將子子悅等將羸兵數百東略吳郡太守袁君正迎降君正當官蒞事有名稱而蓄聚財產服玩靡麗子悅來攻新城戍主戴僧邊勸令拒守土豪陸映公等懼賊脫勝略其資產乃曰賊軍甚銳其鋒不可當今若拒之恐民心不從也君正性怯懦乃載米及牛酒郊迎子悅子悅既至破掠吳中多所調發逼掠子女毒虐百姓吳人莫不怨憤於是各立城柵拒守五月景遣中軍侯子鑒入吳軍收子悅誅之以廂公蘇單于爲吳郡太守是時惟吳郡以西晉陵以北爲景號令所行及宋子仙破會稽執送南郡王大連於建康於是三吳盡爲景有矣六月丙午郡人陸緝戴文舉等起兵萬餘人殺蘇單于推前淮南太守文成侯甯爲主以拒

景鏡爲暴虐吳人不附宋子仙自錢塘移軍擊之七月壬戌緝等棄城走子仙據之戊辰侯景置吳州於吳郡以安陸王大春爲刺史分海鹽胥浦二縣爲武原郡簡文帝大寶元年五月己巳文成侯甯起兵於吳西鄉有衆萬人進攻吳郡行吳郡事景將侯子榮擊殺之因縱兵大掠郡境自晉氏渡江三吳最爲富庶貢賦商旅皆出其地及侯景之亂掠金帛既盡乃掠人而食之或賣於北境吳中遺民殆盡矣是年吳州復爲吳郡二年八月乙丑侯景遣使殺南海王大臨於吳郡大臨以安東將軍爲吳郡太守時張彪起義於會稽吳人陸令公等勸大臨走投彪大臨曰彪若成功不資我力如其撓敗以我說焉不可往也至是遇害元帝承聖元年三月侯景兵敗以皮囊盛二子掛之馬鞍後與房世貴等百餘騎東奔欲就謝答仁於吳王僧辯遣侯瑱追之景至晉陵劫太守徐永四月遂入吳郡進次嘉興趙伯超據錢唐拒之景退還吳郡達松江已酉瑱軍掩至景猶有船二百艘衆數千人瑱擊敗之衆皆舉旛乞降景不能制乃與腹心數十人單舸走推墮二子於

吳郡通典

十九

水自滬瀆入海至壺豆洲前太子舍人羊鯤殺之送首於王僧辯傳首西臺十二月星隕吳郡敬帝紹泰元年十月陳霸先遣裴忌攻吳郡太守王僧智奔吳興初霸先既誅王僧辯僧辯弟僧智舉兵據吳郡霸先遣黃佗率衆攻之僧智出兵於西昌門拒戰佗與相持不能下霸先謂忌曰三吳奧壤舊稱饒沃雖凶荒之餘猶未殷盛而今賊徒扇聚天下搖心非公無以定之宜善思其策忌乃自錢唐趨吳郡夜至城下鼓譟薄之僧智疑大軍至輕舟奔杜龕於吳興忌入據吳郡霸先表授吳郡太守陳文帝天嘉元年三月以孫瑒爲吳郡太守瑒初仕梁爲巴州刺史武帝受禪王琳立梁永嘉王蕭莊於郢州徵瑒郢爲少府卿仍徙都督郢州刺史周遣大將史甯乘虛攻之瑒兵不滿千人乘城拒守周兵不能克及聞大軍敗王琳乘勝而進周兵乃解瑒於是盡有中流之地遣使奉表歸陳授湘州刺史封定襄縣侯瑒懷不自安固請入朝徵爲散騎中領軍未拜帝謂曰昔朱買臣願爲本郡卿豈有意乎改授吳郡太守給鼓吹一部宣帝太建十三年黃門侍郎顧野王

卒野王少以篤學至性知名在朝無過辭失色觀其容貌似不能言及其勵精力行皆人所不能及方侯景作亂野王丁父憂歸本郡乃召募鄉黨數百人隨義軍援京邑野王體素清羸裁長六尺又居喪過毀殆不勝衣及杖戈被甲陳君臣之義逆順之理抗辭作色見者莫不壯之京城陷野王奔會稽尋往東陽與劉歸義合軍據城拒賊侯景平王僧辯深嘉之使監海鹽縣入陳領史職與同郡陸瓊等並以才學顯著論者推重焉後主貞明元年十一月復置吳州以蕭巖爲吳州刺史巖在官甚得物情父老皆曰吾君子也及陳亡吳人推巖爲主有謝異者頗知廢興梁陳之際言無不驗南人甚敬信之後主被擒異奔於巖由是益爲衆所歸隋文帝開皇九年二月右衛大將軍宇文述帥行軍總管元契張默言等攻吳州落叢公燕榮亦以舟師自東海來會是時蕭巖方擁兵固守陳永新侯陳君範自晉陵并巖奔軍拒述遣其將王褒守吳州自義興入太湖欲掩述後述進破其柵迴兵擊巖大破之又遣兵別道襲吳州王褒衣道士服棄城走巖以餘衆保包山

吳郡通典

二十一

燕榮擊破之巖將左右數人匿民家爲人所執獻於述所送長安斬之吳地悉平割鹽官隸杭州改吳州曰蘇州以縣西姑蘇山名也十年十一月蘇州人沈元愴反江表自東晉以來刑法疏緩世族凌駕寒門平陳之後牧民者盡更變之蘇威復作五教使民無長幼悉誦之士民嗟怨復訛言隋欲徙之入關元愴及婺州汪文進越州高智慧遂起兵自稱天子署置百官攻陷州縣陳之故境大抵皆反大者有衆數萬小者數千共相影響執縣令或抽其腸或燔其肉食之曰更能使儂誦五教耶詔以楊素爲行軍總管討之素帥舟師自揚子津入擊京口賊帥朱莫問晉陵賊帥顧世興無錫賊帥葉略皆平之時有江南州民顧子元亦起兵應亂與蘇州刺史皇甫績相持八旬子元素感績恩於冬至日遣使奉牛酒績遣子元書曰皇帝握符受籙合極通靈受揖讓於唐虞棄干戈於湯武東踰蟠木方朔所未窮西盡流沙張騫所不至元漢黃龍之外交臂來王蔥嶺榆關之表屈膝請吏曩者僞陳獨阻聲教江東士民困於荼毒皇天輔仁假手朝廷聊申薄伐應時瓦

死而復生吳會臣民白骨還肉惟常懷音感德行歌擊壤豈宜自同吠主翻成反
竄卿非吾民何須酒禮吾是隋將何容外交易子析骸未能相告况是足食足兵
高城深塹坐待強援綽有餘力何勞踵輕弊之俗作虛偽之辭欲阻誠臣之心徒
惑驍雄之志以此見期必不可得卿宜善思活路曉諭黎元能早改迷失道非遠
子元得書於城下頓首陳謝會素軍至元憎被擒餘黨悉破素因奏蘇城嘗被圍
非設險之地於古城西南橫山之東黃山之下新立城郭匠者以楮木爲城門之
柱素見之曰此木恐非堅可閱幾年匠曰可四十年不朽素曰是城不四十年當
廢後至唐初果復其舊十八年正月辛丑詔曰吳越之民往承弊俗所在之處私
造大船因相聚結致有侵害其後江南諸州民間有船三丈以上悉括入官煬帝
大業三年四月壬辰改州爲郡領吳崑山常熟烏程長城五縣戶一萬八千三百
七十七六年勅穿江南河自京口至餘杭郡八百餘里廣十餘丈使可通龍舟并
置驛宮草頓欲東巡會稽是時吳郡獻海錯有鮑魚乾膾海蝦子鮑魚含肚密蟹

吳郡通典

二十一

擁劍鯉鯁鮓及松江鱸魚乾膾之屬作之皆有法時有口味使杜濟善別味縱口
腹之欲暴殄生物足以戒也又歲送扶芳菰菜裏太湖白魚種子至唐猶然九年
六月乙巳禮部尙書楊元感反七月癸未餘杭人劉元進起兵應之元進手長尺
餘臂垂過膝自以相表非常陰有異志會帝再發三吳兵征高麗三吳兵皆相謂
曰往歲天下全盛吾輩父兄征高麗者猶大半不返今已罷弊復爲此行吾屬無
遺類矣由是多亡命郡縣捕之急聞元進舉兵亡命者雲集將渡江而元感敗八
月癸卯吳郡朱燮晉陵管崇復聚衆寇掠江變本還俗道人涉獵經史頗知兵法
形容眇小爲崑山縣博士與數十學生起兵民苦役者赴之如歸崇長大美姿容
志氣倜儻隱居常熟自言有王者相故羣盜相與奉之至是共迎元進推以爲主
據吳郡稱天子燮崇俱爲尙書僕射署置百官毗陵東陽會稽建安豪傑多執長
吏以應之十月帝遣左屯衛大將軍吐萬緒光祿大夫魚俱羅將兵討之元進西
屯茅浦以抗官軍頻戰互有勝負緒進屯曲阿元進結柵拒緒緒擊之賊衆大潰

死者萬數元進夜遁保其壘緒乘勝進擊朱燮等復破之賊退守黃山緒圍之元進燮僅以身免於陳斬崇及其將卒五千餘人收其子女三萬餘口進解會稽圍俱羅與緒偕行戰無不克然百姓從亂者衆賊兵散而復聚緒以士卒疲弊請息甲以待來春帝不悅有司希旨奏緒怯懦俱羅敗屺乃斬俱羅而徵緒還緒憂憤道卒更遣江都丞王世充發淮南兵討之十二年五月癸巳有大流星墜於江都未及地而南逝拂磨竹木皆有聲至吳郡而落於地元進惡之令掘地二丈得一石徑丈餘後數日失石所在方世充之渡江也元進將兵拒戰殺千餘人世充窘急退保延陵柵元進遣兵持茅縱火世充大懼將棄營遁遇反風火轉元進率衆退世充掩擊大破之頻戰皆捷元進燮敗死餘衆或降或散世充召先降者於通元寺瑞像前焚香爲誓約降者不殺散者始欲入海爲盜聞之旬月之間歸首略盡世充貪而無信利其子女資財悉阬之於黃亭澗死者萬餘人由是餘黨復相聚爲盜官軍不能討吳中恆爲賦陷沈法興李子通輩乘此而起戰爭不息逮於

吳郡通典

一十二

隋亡

吳郡通典備彙五

唐高祖武德元年三月吳興太守沈法興聞宇文化及弑逆舉兵以討化及爲名比至烏程得精卒六萬攻餘杭毗陵丹陽皆下之據江表十餘郡自稱江南道大總管承制置百官二年八月法興自稱梁王都毗陵改元延康法興性殘忍專尙威刑將士小有過即斬之由是其下離怨時杜伏威據歷陽陳稜據江都李子通據海陵俱有窺江表之心九月辛未子通攻陳稜取江都稱帝國號吳改元明政三年子通渡江攻法興取京口法興棄毗陵奔吳郡於是丹陽毗陵等郡皆降於子通杜伏威遣行臺左僕射輔公柘攻子通子通敗走棄江都保京口江西之地盡屬於伏威伏威徙居丹陽子通復東走太湖收合亡散得二萬人襲法興於吳郡大破之法興率數百人棄城走吳郡賊帥聞人遂安遣其將葉孝辨迎之法興中途而悔欲殺孝辨更向會稽孝辨覺之法興窘迫赴江死子通軍勢復振徙都餘杭盡收法興之地北自太湖南至嶺東包會稽西距宣城皆有之四年十一月

吳郡通典

一二十三

伏威使其將王雄誕擊子通降聞人遂安據崑山無所屬伏威使雄誕擊之雄誕以崑山險隘以力勝乃單騎造其城下陳國威靈示以禍福遂安感悅出降於是伏威盡有江東之地五年七月丁亥伏威入朝六年六月壬子輔公柘反稱帝於丹陽國號宋修陳故宮室而居之江南郡復陷七年三月戊戌趙郡王孝恭克丹陽公柘棄城東走句容宿常州至武康被執分捕餘黨悉誅之是歲置蘇州都督督蘇湖杭暨四州移新州卻後舊城升爲望分吳縣置嘉興八年廢嘉興入吳縣九年罷蘇州都督太宗貞觀元年二月分天下爲十道初隋末喪亂豪桀並起擁衆據地自相雄長唐興相率來歸高祖爲割置州縣以寵祿之由是州縣之數倍於開皇大業之間帝以民少吏多思革其弊命大加併省因山川形便以分十道蘇州領吳嘉興崑山常熟四縣戶一萬一千八百五十九口五萬四千四百七十一十二年旱高宗永隆元年十月壬寅蘇州刺史曹王明坐故太子賢黨降封零陵郡王黔州安置王太宗十四子在州不循法度長史孔禎恒進諫王曰寡人天

子之弟豈失於王哉禎曰恩義不可恃大王不奉行國命恐今之榮位非大王所保獨不見淮南之事乎王左右有侵暴下人禎捕而杖殺之至是王果坐法謂人曰吾愧不用孔長史言以及於此武后垂拱四年六月江南道巡撫大使狄仁傑以吳楚多淫祠奏焚其一千七百餘獨留夏禹吳泰伯季札伍員四祠萬歲通天元年分吳縣置長州在郭下分治州界大足元年七月乙亥地震睿宗景雲二年初置十道按察使分嘉興縣置海鹽海鹽本漢縣久廢至是復置元宗先天元年廢海鹽縣開元五年復置治吳禦城十四年秋大水漂壞廬舍二十一年分天下爲十五道各置採訪使以六條檢察非法擇賢刺史領之蘇州屬江南東道二十七年定聖賢封號贈言子游爲吳侯天寶元年詔更天下州爲郡刺史曰太守以蘇州爲吳郡領吳嘉興崑山常熟海鹽五縣戶七萬六千四百二十一口六十三萬二千六百五十五吳郡歲貢絲葛十疋白石脂三十斤蛇牀子三個鱸魚三十頭鮫魚腊五十頭壓胞七斤肚魚五十頭春子五升嫩藕三百段

吳郡通典

一二十四

同吳郡通典所載亦有出注氏疏 肅宗乾元元年仍改吳郡爲蘇州十二月甲

辰以昇州刺史韋黃裳爲蘇州刺史浙西節度使是時初置浙江西道節度兼江甯軍使領昇潤宣歙饒江蘇常杭湖十州治昇州尋徙蘇州二年廢浙江西道節度使置觀察處置都團練守捉及本道營田使更領丹陽軍使治蘇州復領宣歙饒三州上元元年十一月劉展將張景超據蘇州展初爲宋州刺史與御史中丞李銑皆領淮西節度副使銑既誅展偏僮不受命節度使王仲昇遣監軍使邢延恩入奏請除之延恩因言展方握彊兵宜以計去之請除展江淮都統代李暉俟釋兵赴鎮中道執之此一夫力也帝從之密勅舊都統李暉及淮南東道節度使鄧景山圖之展聞命乃悉舉宋州兵七千趣廣陵延恩知展已得其情還奔廣陵與暉景山發兵拒之移檄州縣言展反展亦移檄言暉反州縣莫知所從既與展軍戰大潰景山奔壽州暉奔宣城方暉之去潤州也副使李藏用說暉曰處人尊位食人重祿臨難而逃之非忠也以數十州之兵食三江五湖之險固不發一矢

而棄之非勇也失忠與勇何以事君暉乃悉以事委藏用藏用收散卒得七百人東至蘇州募壯士得二千人立柵以拒與展將張景超等戰於郁聖兵敗奔杭州景超遂據蘇州以其將楊持璧爲蘇州刺史二年正月丁未田神功將兵擊展斬之展將王嘔引兵東走至常熟乃降景超逃入海餘黨悉平代宗大歷七年八月丙子以李栖筠爲御史大夫方栖筠爲常州刺史蘇州豪士方清因歲凶誘流孳爲盜移數萬依黟歙間阻山自防東南厭苦李光弼分兵討平之會平盧行軍司馬許杲恃功擅留上元有窺江吳意朝廷以創殘重起兵卽拜栖筠蘇州刺史兼御史中丞浙西都團練觀察使圖之栖筠至張設武備遣辯士厚齎金帛抵杲軍賞勞使士歆愛奪其謀杲懼悉衆渡江掠楚泗而潰則又增學廬表宿儒河南褚冲吳何員等超拜學官爲之師身執經問義遠邇趨慕至徒數百人又奏部中豪姓多徙貫京兆河南規脫徭科請量產出賦以杜奸謀詔可時元載當國恣橫帝厭之思得剛鯁大臣爲心腹至是內出制書拜栖筠官宰相不知載由此稍絕九

吳郡通典

二十五

年王綱以大理司直爲崑山令政務化民始作學舍置博士弟子員民興於學有不被儒服而行者莫不恥焉十年七月己未蘇杭湖越等州大風海水翻潮飄蕩州郭德宗貞元二年韋應物自左司郎中爲蘇州刺史應物性高潔鮮食寡欲所在焚香掃地而坐在郡最久民賴以安又能賓儒士招隱獨顧况劉長卿輩類見旌引與之酬唱時人賢而慕之天下號曰韋蘇州六年夏大旱井泉竭人多渴疫死者甚衆七年火八年于頔爲蘇州刺史繕完隄防疏鑿畎澮列樹以表道決水以溉田同時有滕遂爲長洲令攝吳縣百姓歌曰朝判長洲暮判吳道不拾遺人不孤人謂有漢叔輔之遺風憲宗元和二年十月鎮海軍節度使李錡反先是遣腹心五人爲所部五州鎮將姚志安處蘇州李深處常州趙惟忠處湖州邱自昌處杭州高肅處睦州各有兵數千伺察刺史動靜刺史至斂手無敢與敵至是錡各使殺其刺史常州刺史顏防用其客李雲計矯制稱詔討副使斬李深傳檄蘇杭湖睦請同進討湖州刺史辛秘潛募鄉閭子弟數百夜襲趙惟忠營斬之蘇州刺

史李素至任甫十二日將左右與賊戰州門不勝賊呼入素端立責以義皆斂兵立不逼錡命械致軍將斬以徇具桎梏釘於船舷未及京口會錡敗得免三年秋旱素因請於浙西觀察使韓阜開常熟塘自齊門北抵常熟長九十里更名元和塘劉允文爲之記曰吳之藪曰具區郡之大惟蘇州商爲貨居農實邦本錡貢多品厥田上中土宜在民地利乎水常熟塘案圖經云南北之路自城而遙百有餘里旁引湖水下通江潮支連派分近委遐輸左右惟強家大族疇接壤制動涉千頃年登萬箱豈伊沿沂之功實由灌溉之利故名常熟歲無眚焉泊貞元年來時屬大旱由是填淤薦爲塗泥而淪胥怨咨殖物痛矣郡守李公乃計工量日候隙庀徒爲利涉之宜蔽反壤之害詢蓄洩之勢增遠近之防人不告勞事爲永逸先期而望表繩直不日而終朝子來塘開地中工畢泉出山澤作氣江湖發源積爲長流實自新浙舟楫鱗集農商景從春秋有施水旱斯備非體仁宏多應用高朗曷以越前所未暇迨今而行其志哉

案此塘多采以所世言吳中水利者此爲素在最先又所引圖經尤爲近古故節錄其文以資考覈

吳郡通典

一二十六

蘇三年州民稱治四年十一月旱五年蘇州刺史王仲舒隄松江爲路時松陵鎮南北西俱水鄉抵郡無陸路至是始通建橋其上濶所東寶帶以助公費因名之曰寶帶橋十二年六月水害稼是時李吉甫纂元和郡縣志成蘇州編戶十萬八百八穆宗長慶元年四月有大星墜於吳聲如飛羽二年七月以御史中丞李德裕爲蘇州刺史初南方信禳祥雖父母癘疾子棄不敢養德裕擇長老可語者諭以孝慈大倫患難相收不可棄之義使歸相曉勅違者顯寘之法數年惡俗大變毀淫祠撤私邑山房千四百舍寇無所廋蔽有詔褒馬四年夏水太湖溢敬宗寶歷元年六月乙巳水壞太湖隄入城郭漂民廬舍十一月戊申水傷稼時李德裕爲浙西觀察使獻丹扈六箴有詔浙西上脂盞妝具德裕奏比年物力未完今所須脂盞妝具度用銀二萬三千兩金百三十兩物非土產雖力營索尙恐不逮願宰相議何以俾臣不違詔旨軍興不疲人不歛怨則前勅後詔咸可遵承又詔索盤繼繚綾千疋復奏言盤繼文采怪麗惟乘輿當御今廣用千疋臣所未喻優詔

爲停自元和後禁無私度僧徐州王智興給言天子誕月請築壇度人以資福德
裕劾智興募願度者人輸錢二千不復勘詰普加髡落自淮南而右戶三丁男必
一男別髮規影徭賦所度無算臣閱渡江者日數百蘇常齊民十固八九若不加
禁遏則前至誕月江淮失丁男六十萬不爲細變有詔禁止是年白居易以太子

左庶子分司東都復拜蘇州刺史

按本傳不詳在蘇年月據年譜在寶曆元年月日無考故附此

唐物部當於郡之未定佛寺考寶曆之里貞元已四十年香山吳郡詩石記專爲物部應集詩而
作記中言十四五時歲蘇杭二郡以幼穉不得與游處其最盛章公甚至設有章公尙寓蘇州竟不相聞問
耶世稱章自特以其志趣相舍非必果屬同時也唐書於
居易高行美才在官勤瘁見於題詠
兩公任蘇均不詳記恐世代易滋非午特附訂其數於此

嘗作虎邱路免於病涉兼障流潦未幾以病求去劉禹錫贈以詩云姑蘇十萬戶
皆作嬰兒啼蓋其實也禹錫後亦爲蘇州刺史以政最賜金紫服文宗太和四年
夏蘇湖二州水壞六隄入郡郭溺廬井五年六月辛卯水傷稼六年二月大水地
震生白毛七年十月辛酉水害稼開成三年水溢入城僖宗乾符二年四月浙西
狼山鎮遏使王郢反郢等六十九人皆有戰功節度使趙隱賞以職名而不給衣

吳郡通典

二十七

糧郢等論訴不獲遂劫庫兵作亂行收黨衆近萬人攻陷蘇常乘舟往來泛江入
海轉掠二浙南及福建大爲人患四年正月以右龍武大將軍宋皓爲江南諸道
招討使率兵平之方郢之亂市邑廢毀至是刺史張搏乃重修羅城南北長十二
里東西九里中和二年二月馬生角鎮海軍節度使周寶以其壻楊茂實爲蘇州
刺史重斂人不聊田令孜以趙載代之茂實不受命寶表留不聽乃殘郢署汙垣
廂去詔以王蘊代之茂實在蘇州溺於妖巫作火妖神廟於子城之南隅祭以牲
牢外用炭百餘斤燃於廟庭自是吳中兵火洵作光啟二年正月辛巳鎮海牙將
張郁作亂初周寶差郁押兵士三百人戍於海次因正旦酗酒殺使府安慰軍將
度不免遂作亂王蘊謂州兵還休不設備郁遂大掠蘊嬰城守寶遣將拓跋從領
兵討之郁自常熟取江陰入常州刺史劉革降衆稍集又遣丁從實攻之郁走海
陵十月感化牙將馮宏鐸張雄得罪於節度使時溥聚衆三百走渡江襲蘇州據
之自稱刺史稍聚兵至五萬戰艦千餘自號天成軍周寶開高駢將徐約兵銳甚

誘之使擊雄三年四月甲辰約入蘇州雄帥其衆逃入海以約爲蘇州刺史陰禦
董昌約至蘇未逾年建九江王廟殿堂屋壁塑神龍蛟螭繪畫雲雷波濤之狀蘇
州連大水民幾不粒食者三載

吳郡通典備彙六

僖宗文德元年九月杭州刺史錢鏐遣從弟錄將兵攻徐約於蘇州昭宗龍紀元年三月丙申錢錄拔蘇州約初聞錄兵至驅州人守城墨鏡其形曰願戰南都從事或曰都者國稱杭終有國乎後約寢寤與其下哭而別入海中箭死鏐以海昌都將沈粲權知蘇州事十月唐以給事中杜孺休爲蘇州刺史以知州事沈粲爲制置指揮使大順元年七月楊行密將李友陷蘇州鏐密使沈粲害孺休方孺休之見攻也曰勿殺我當與爾金粲曰殺爾金焉往遂與兄延休同遇害鏐欲歸罪於粲而殺之粲奔孫孺九月楊行密以其將張行周爲常州制置使閏月孫孺遣劉建鋒攻拔常州殺行周遂圍蘇州十二月孫孺拔蘇州殺李友使沈粲守蘇州二年八月孺自蘇州出屯廣德十二月孺焚掠蘇常引兵逼宣州鏐復遣師蘇州景福元年二月鏐以錄爲蘇州招緝使乾寧元年二月鏐以成及權蘇州刺史二年二月威勝軍節度使董昌反四月辛卯蘇州雨雪六月詔以鏐爲浙江東道招

吳郡通典

二十九

討使彭城郡王起兵討董昌八月董昌求救於楊行密九月行密遣將臺濛等圍蘇州以應昌十月淮南將柯厚破蘇州水柵三年四月淮南兵與鎮海兵戰於皇天蕩鎮海兵不利行密遂圍蘇州癸未蘇州常熟鎮使陸郢以州城應行密虜刺史成衍及行密閱及家所蓄惟圖書葯物賢之歸署行軍司馬及拜且泣曰及百口在錢公所失蘇州不能死敢求富貴願以一身易百口之死引佩刀欲自刺行密遽執其手止之館於府舍其室中亦有兵仗法行密每單衣詣之與之共飲膳無所疑厚爲禮而歸之鏐迎勞郊外把袂而泣時以蘇州陷急召顧全武議將分兵西陵以備北寇全武上言曰賊之根本繫於甌越豈以失一姑蘇遂追天討願先拔越城然後復茂苑未遲鏐從之乙未克越州己丑斬董昌四年六月鏐如越州受鎮東節鉞七月命顧全武率師復蘇州乙未拔松江戍戍拔無錫辛丑拔常熟華亭八月屯崑山十月行密以臺濛守蘇州五年正月鏐命師救蘇州生擒淮南將李近思斬首一千餘級殺其將梁琮等淮南將李簡復以五千餘人屯無錫

攻敗之獲其偏將陳益等而還三月淮南將周本救蘇州顧全武禦之九月全武
攻蘇州城中及援兵食皆盡甲申臺濠李德誠等棄城走援兵亦遁全武克蘇州
追敗周本等於望亭獨秦裴以兵三千戍崑山相持不下全武帥萬餘人攻之裴
屢出戰使病者被甲執矛壯者毅弓弩全武每爲之卻全武嘗髡髮爲沙門軍中
皆諱言僧至是檄裴令降裴果封函納款全武喜召諸將發函乃佛經一卷全武
大慙曰裴不憂死何暇戲予益兵攻城引水灌之城壞食盡裴乃降鏐設千人饌
以待之乃出羸兵不滿百人鏐怒曰單弱如此何敢久爲旅拒對曰裴義不負楊
公今力屈而降耳非心降也鏐善其言顧全武亦勸宥之時人稱全武長者全武
甚有識度卒能佐鏐保據一方蘇州之克皆其功也梁太祖開平二年九月淮南
將周本呂師造攻蘇州推洞屋攻城吳越將孫瑛置輪於竿首垂絙投錘以揭之
攻者盡露礮至則張網以拒之淮南人不能克吳越王鏐遣牙內指揮使錢驃行
軍副使杜建徽等將兵殺之蘇州有水通城中淮南張綱綴鈴懸水中魚鼈過皆

吳郡通典

三十一

知之吳越游弈都虞侯司馬福欲潛行入城故以竿觸網敵聞鈴聲舉網福因得
過凡居水中三日乃得入城由是城中號令與援兵相應敵以爲神初吳越王鏐
嘗游府園見園卒陸仁章樹藝有智而志之及蘇州被圍使仁章通信入城果得
報而返鏐以諸孫蓄之累遷兩府軍糧都監使卒獲其用辛亥吳越兵內外合擊
淮南兵大破之擒其將何朗等三千餘人獲兵甲生口三十萬奪戰艦二百餘艘
周本呂師造夜遁又追敗之於皇天蕩鍾泰章將精兵二百爲殿多旗幟於菰蔣
中追兵不敢進而還是歲吳越王以中原喪亂改元天寶私行境中旣而復通中
國或諱而不稱三年五月王親巡蘇州閏八月梁從王請勅於松江置縣曰吳江
屬蘇州乾化二年改蘇州虎嚙曰濟墅避王嫌名也三年十月王以子傳瓌權蘇
州刺史龍德二年修蘇州城以磚甃之高二丈四尺厚二丈五尺內外有濠末帝
貞明元年十一月置都水營田使以主水事募卒號撩淺軍亦謂之撩清命於太
湖旁置卒四郡凡七八千人常爲田事治河築隄一路徑下吳淞江一路自急水

港下澱山湖入海居民旱則運水種田澇則引水出田立法甚備三年吳王楊隆演以前舒州刺史陳璋將兵侵蘇湖五年七月吳越王遣子傳瓘將兵攻常州吳徐溫來拒命陳璋以水軍下海門出吳越兵後壬申戰於無錫指揮使何逢吳建死焉遂班師徐知誥請帥步卒二千易吳越旗幟鎧仗臨敗卒而東襲取蘇州溫曰爾策固善然吾且求息兵未暇如汝言也諸將皆以爲吳越所恃者舟楫今大旱水道涸此天亡之時也宜盡步騎之勢一舉滅之溫歎曰天下離亂久矣民困已甚錢公亦未易可輕若連兵不解方爲諸君之憂今戰勝以懼之戢兵以懷之使兩地之民各安其業君臣高枕豈不樂哉多殺何爲八月吳歸無錫之俘來請通好吳越王納之自是休兵二十餘年唐莊宗同光二年十一月陞蘇州爲中吳軍領常潤等州唐授王子傳瓘鎮東節度檢校太保兼中書令大彭郡侯充中吳軍節度使是歲吳越改元寶大三年十月鎮海鎮東留後王子傳瓘中吳軍節度使王子傳瓘各貢唐錦綺千件及九經書史四百二十三卷又貢佛頭螺子青一

吳郡通典

三十一

山螺子青十婆薩石蟹子四空青四明宗天成元年中吳軍大水水中生米大如豆民取食之是歲吳越改元寶正長興三年三月庚戌吳越王鏐薨諡曰武肅遣命去國儀用藩鎮法除民田荒絕者租稅子傳瓘嗣位更名元瓘兄弟名傳者皆更爲元四年七月王兄元瓘自蘇州入見王置宴宮中用家人禮王起酌酒爲壽曰先王之位兄宜當之俾小子至是實兄推戴之力元瓘俯伏曰王功德高茂先王擇賢而立敢忘恭順因相顧感泣酣樂而罷晉高祖天福三年十二月王兄元瓘請析嘉興縣之西鄙義和鎮爲崇德縣五年三月復奏以嘉興縣置秀州嘉興海鹽華亭崇德四縣屬焉於是蘇州領吳長洲崑山常熟吳江五縣是歲蘇州大水六年八月辛亥文穆王元瓘薨子忠獻王宏佐嗣位問倉吏今畜積幾何對曰十年王曰然則軍食足矣可以寬吾民乃令復其境內稅三年七年三月乙丑中吳建武等軍節度使元瓘卒晉勅青廣陵郡王不及受命宣旨於柩前葬以王禮諡曰宣義子文奉嗣元瓘性儉約而恭靖在蘇州三十年保全屏蔽厥功甚偉海

虞二十四浦潮汐二至挾沙以入淤塞支港元璩遣開江營將梅世忠爲都水使每港募兵丁設牖港口按時啟閉以備旱澇更虞海濱多警特創水寨軍授李開山爲水寨將軍屯兵於澚浦壩身召民開市民稱利便齊王開運四年六月乙卯王宏佐薨弟忠遜王宏侗嗣位尋爲胡進思所廢以王弟忠懿王宏俶嗣位宏俶後以名犯宋宣祖偏諱去宏以俶單行漢隱帝乾祐二年吳越置營田卒數千人以澚江關土而耕周世宗顯德三年三月吳越命知中吳軍節度事文奉爲水陸應援諸軍都統使屯於本州備徵發宋太祖開寶元年六月戊午蘇州長洲縣民王安妻一產三子二年八月中吳軍節度使文奉卒文奉繼元璩後治吳亦三十年於郡中建南園東莊爲吳中之勝奇卉異木及其身見皆已合抱累土爲山並成巖谷延接賓旅任其所適自號曰知常子一時名士多依之八年十二月改中吳軍爲平江軍以孫承祐爲節度使太宗太平興國三年三月吳越王俶入朝五月表請以所部十三州一軍八十六縣戶五十五萬六百八十兵一十一萬五千

吳郡通典

三十一

三十六盡獻於宋帝嘉納之丁亥改封王爲淮海國王吳越凡三世五王總九十八年

吳郡通典備彙七

宋收吳越版圖以平江軍爲蘇州屬兩浙轉運使治焉是時戶主二萬七千八百入十九客七千三百六詔以禁兵千人命閻象安撫遂知蘇州象在蘇有善政恩涵澤濡民賴以安

案此節當非太宗太平興國三年以前卷已書錢俶納土編年不宜復見故變其例

淳化二年虎夜入福山砦食卒四人四年知蘇州宋璿卒初三吳歲饑疾病民多死擇長吏養治之璿體豐碩素病足至州地卑溼疾益甚或勸其謝疾北歸璿曰天子以民病俾我綏撫我以身病而辭焉非臣子之義也既而太白犯南斗璿曰斗爲吳分民方饑天象如此長吏得無咎乎至是卒帝甚嗟悼真宗咸平元年蘇州解後園禾生合穗大中祥符二年蘇州戶六萬六千一百三十九四年九月蘇州吳江水災汎溢壤民廬舍是歲詔免諸路在僞國日所出丁身錢並特除放由是蘇民無計口算縉之事蒙澤最厚五年兩浙轉運使徐奭奏置開江營兵一千二百人專修吳江塘路南至嘉興一百餘里天禧二年令江淮發運副使張綸同知蘇州孫寃疏崑山常熟諸湖

吳郡通典

三十三

港浦導太湖水入海復歲租六十萬斛乾興元年水無禾田生聖米居民取以食詔以蘇湖秀三州積水害稼發鄰郡兵疏導壅閼命發運使董之仁宗天聖元年八月以蘇州大水壞太湖內塘又海旁支渠堙塞廢民耕田詔轉運使徐奭江淮發運使趙賀等相度自市涇以北赤門以南築石隄九十里起橋十有八濬積潦自吳江東赴海復良田數十萬畝疏隱田者二萬六千戶得苗三十萬二年四月塘成遷爽兩浙轉運使封晉陵侯致仕遂家吳中景祐元年知蘇州范仲淹上書宰相議濬白茆等浦疏導諸水方帝即位初賜堯州學田已而又命藩輔皆得立學其後諸旁郡多願立學者詔悉可之由是學校之設徧天下仲淹以鄉人典郡因朱公綽等請聞於朝二年詔蘇州立學仍給田五頃仲淹初購錢氏南園地欲以下宅比得請割以創焉時學者纔逾二十人或言其太廣仲淹曰吾恐異日以爲小也於是延安定先生胡瑗以爲師瑗教授蘇湖間二十餘年束脩弟子以數千計登科名者甚衆是時方尙詞賦獨瑗以經義及時務學爲重有經義齋治事

齋擇疏通有器局者居之治事當者人各治一事又兼一事如邊防水利之類科條纖悉備具以身先之雖盛暑必公服坐堂上嚴師弟子之禮視諸生如其子弟諸生亦信愛如其父兄吳中文教蒸蒸日上如滕甫范純仁錢藻輩皆知名當世慶歷二年蘇州通判李禹卿以松江風濤漕運多敗官舟遂築大隄界於松江太湖之間橫截五六十里皇祐四年五月資政殿學士汝南公范仲淹卒贈兵部尙書諡文正初仲淹病帝遣使賜藥存問既卒嗟悼久之又遣使就問其家帝親書其碑曰褒賢之碑仲淹人物爲宋世第一其學以忠孝爲本其志則先天下之憂而憂後天下之樂而樂粹然儒者蓋無愧焉方仲淹始貴顯置義宅於里中使其族屬世世居焉又買常稔田千畝號曰義田以濟養羣族日有食歲有衣嫁娶凶葬皆有購擇族之長而賢者主其計以時出納族之聚者九十口歲入給稻八百斛以其所入給其所聚屏而家店俟代者與焉仕而之官者罷其給子孫世守弗替里人之富而好善者多取以爲法由是義莊之制被乎天下至和二年崑山主

吳郡通典

三十四

簿邱與權議築崑山塘自婁門至崑山縣治凡七十里舊連湖瀆皆積水無陸途至道間知蘇州陳省華始議築塘其後屢謀未就至是興權陳五利一曰便舟楫二曰闢田疇三曰復租賦四曰止盜賊五曰禁姦商長吏避之十月甲午興役旬有九日而畢工更塘名曰至和以識年號建亭其上曰乙未以紀歲功嘉祐四年招置蘇州開江兵士立吳江崑山常熟城下四指揮五年七月水轉運使王純臣建議請令蘇湖常秀四州並築田塍位位相接以禦風濤令縣官教誘殖利之戶自作塍岸定其勸課爲殿最當時多見施行八年轉運使奏常州望亭堰牘廢撥兵士隸蘇州開江指揮於崑山縣置營興修至和塘岸神宗熙甯元年命雍元直自昭文編校治浙西河渠二年頒農田水利約束三年崑山縣人郝亶自廣東安撫司機宜文字上言蘇州水利有六失六得其疏累數萬言極陳利病朝議以爲可除亶司農寺丞提舉興修亶至蘇興役凡六郡三十四縣比戶調夫同日舉役轉運提刑皆受約束民以爲擾多逃移會呂惠卿被召言其措置乖方六年正月

遂罷役賈追司農寺丞送吏部流內銓賈既沒其子僑又嗣緝其說因歲事亦有
所建明七年旱太湖水涸是年以蘇州屬浙西路蘇州商稅五務歲額五萬貫以
上酒課七務歲額二十萬貫以上自十年以後逐有增益元豐元年七月四日夜
大風雨潮高二丈餘漂蕩尹山至吳江塘岸洗滌橋梁沙土皆盡惟石僅存崑山
張浦沙保有六百戶悉漂盡惟餘五戶空屋人亦不存三年蘇州戶十九萬九千
八百九十二丁三十七萬九千四百八十七是時最稱殷盛歲輸帛八萬疋續二
萬五千兩苗三十四萬九千斛輸錢免役者八萬五千緡有奇又有鹽稅權酷之
利蓋自昔所未有也顧民安饒富崇棟宇豐庖廚嫁娶喪葬奢厚逾度捐財無益
之地斲產不急之務此固習使然是年詔賜米三萬石開蘇州至杭州運河淺澗
處四年七月太湖溢自吳江至平望民居盡壞死者萬餘人時章帖自兩浙轉運
使移知蘇州帖少與兄岷峴侍親居郡中名譽藉甚岷嘗爲平江軍節度推官知
州盛度黃宗且多以事委之度俾閱經史凡言吳事者錄爲一書書成藏盛氏人

吳郡通典

三十五

不得見咸以爲惜帖任蘇政聲流聞會任滿詔曰吏不數易然後得以究其材今
夫蘇劇郡也而爾爲之守克有能稱嘉省厥勞仍其舊服往惟率職不懈以稱吾
久任之意哉可令再任七年九月朱長文撰吳郡圖經續記成上之帖自爲序曰
吳爲古郡其圖志相傳固久自大中祥符中詔修圖經每州命官編輯而上其詳
略蓋系乎其人而諸公刊修者立類例據錄而刪撮之也夫舉天下之經而修定
之其文不得不簡故陳迹異聞難於具載由祥符至今逾七十年矣其間近事未
有紀述也元豐初臨淄晏公出守是邦嘗語長文曰吳中遺事與古今文章湮落
不收今欲綴輯而吾所善練定以謂惟子能爲之也長文自念屏迹陋巷未嘗出
庭戶於訪求爲艱而練君道晏公意屢見趣勉於是參考載籍探摭舊聞作圖經
續記三卷凡圖經已備者不錄素所未知則闕如也會晏公罷郡乃藏於家今太
守武甯章公謂長文曰聞子嘗爲圖經續記矣余願觀焉於是稍加潤飾繕寫以
獻實諸郡府用備諮閱固可以質凝滯根利病資議論不爲虛語也長文公綽子

少第進士以病足不就吏爲本州教授用經術造士築室郡中帖表之曰樂園鄉人稱爲樂園先生哲宗元祐三年翰林學士蘇軾奏宜與人單錫水利書事不果行六年知杭州林希轉言太湖積水爲蘇州大患乞委監司相度開決庶民田可耕流移復業有詔遣左朝奉郎邵光與本路監司導決諸河是年蘇軾知杭州上言二年浙西諸郡災傷今歲大水蘇湖常三州水通爲一杭州死者五十餘萬蘇州三十萬未數他郡今既秋田不種正使來歲豐稔亦須七月方見新穀變故未易度量乞令轉運使約度諸郡合糴米斛數目下諸路封椿及年計上供赴浙西諸群糴賣詔賜米百萬斛錢二十餘萬緡振濟災傷紹聖元年秋海風壞民田二年自夏迄秋地震元符二年冬水三年詔蘇湖秀州凡開治運河浦港溝瀆修疊隄岸開置斗門水堰等許役開江兵卒徽宗崇寧元年三月命童貫製御器於蘇杭貫於二州置局造竹器曲盡其巧牙角犀玉金銀竹籐裝畫糊抹雕刻織繡諸色匠日役數千而材物所需悉科於民民力大困是年蘇州戶一十五萬二千八

吳郡通典

三十一

百二十一口四十四萬八千三百一十二詔置提舉淮浙澳牘司於蘇州四年十一月命朱勳領蘇杭應奉局及花石綱初勳與父冲俱給蔡京所京竄其父子名姓於童貫軍籍中皆得官帝頗垂意花石京諷冲密取浙中珍異以進帝頗嘉之後歲歲增益舳艫相銜於淮汴號花石綱乃以勳總領其事。至搜巖別藪幽隱不遺凡士庶之家一石一木稍堪玩者即領健卒直入其家用黃封表識使護視之微不謹即被以大不恭罪及發行必徹屋抉牆以出進之京師以飾良獄人不幸有一物小異共指爲不祥惟恐芟夷之不速民預是役者中家破產或鬻賣子女以供其需廟山輦石程都慘刻雖在江湖不測之淵百計取之必得乃止篙工舵師倚勢貪橫凌轢官吏道路側目進節度使子弟並竊官爵園夫畦子能精種植及疊石爲山者釋擔卽紆金紫肆行誹擾民不能堪大觀元年十月辛酉地震是年水從中書舍人許光凝請命本路監司檢松江古跡導積水入海并相度圩岸政和三年四月蘇州火延燒公私屋一百七十餘間是年陸平江軍爲府領

吳長洲崑山常熟吳江五縣五年八月水六年四月詔曰聞平江三十六浦自昔置牖隨潮啓閉歲久湮塞積水爲患其令守臣莊徽專委戶曹趙霖講究利害導歸江海依舊置牖三十六浦者崑山十有二掘浦下張浦七了浦茜涇浦楊林浦六鶴浦顧涇浦川沙浦五岳浦蔡浦琅巷浦常熟二十四許浦白茆浦福山浦黃泗浦奚浦西陳浦東陳浦水門塘崔浦耿涇浦魚磳浦鄔溝浦瓦浦塘浦高浦金涇浦石撞浦陸河浦北浦甘草浦千步涇司馬涇金涇錢涇黃鶯漕也八月詔霖相度役興而兩浙擾甚詔罷役重和元年詔兩浙霖雨復以趙霖提舉常平措置水利八月詔加直秘閣宣和元年正月霖役夫興工修華亭縣之青龍江江陰縣之黃田港及茜涇浦掘浦崔浦黃泗浦等處三月坐增修水利不當降兩官六月詔霖興修水利已見成績進直徽猷閣仍復所降兩官十月四日御筆訪聞平江府常熟縣常湖秀州華亭泖並可爲田仰趙霖相度措置召租限一季了當具便民利害圖籍歲入以聞霖又應詔修治支錢四十餘萬貫出自度牒官誥坊場市

吳郡通典

三十七

易抵當等名色凡十九種提舉水利農田所奏浙西平江諸州積水減退欲委官分詣鄉村檢視露出田土惟人戶見業已納省稅不括外其餘逃田天荒草田葑菱蕩及湖濶退灘沙塗等地悉標記置籍召人請射種植視鄉例拘納租課椿充御前錢物專一應奉御前支用置局提舉如造謗惑衆沮害之人罪徙從之二年十月睦州人方臘作亂時蘇杭困於朱勔花石之擾比屋嗟歎太學生鄧肅進詩諷諫帝不聽放肅歸田里肅益橫臘有漆園造作局爲勔酷取怨而未敢發至是假誅勔爲名以左道惑衆爲亂命童貫討平三年正月詔罷花石綱欽宗靖康元年勔伏誅

吳郡通典備彙八

高宗建炎元年詔於平江崑山縣江灣浦量收海船稅應官司回易諸軍收買物色依條收稅三年二月金人陷揚州帝南渡至平江府時郡中富民私或遁去然市井貿易如故帝至府治始去介冑易黃袍儀衛稍增詔諭百姓駐駕三日乃起遂幸臨安府命朱勝非節制平江秀州軍馬張浚副之以兵八千守吳江留王淵守平江三月以朱勝非爲尙書右僕射兼中書侍郎命張浚駐平江會扈從統制苗傅劉正彥作亂劫帝傳位於皇子奭改元明受赦書至平江張浚命守臣湯東野秘不宣既而得苗傅等所傳檄慟哭召東野及提刑趙哲謀共討之時傅令張浚以三百人赴秦鳳而以餘兵屬他將浚知其僞拒不受即引所部八千人至平江浚見浚語故相持而泣且諭以將起兵問罪時赦至江甯呂頤浩曰是必有兵變即寓書於浚浚以頤浩有威望能斷大事乃答書約其起兵且告劉光世於鎮江令以兵來會頤浩得書上疏請復辟遂以兵發江甯韓世忠自鹽城由海道將

吳郡通典

三十八

赴行在至常熟浚聞之曰世忠來事濟矣因白浚以書招之世忠至平江見浚慟哭曰今日之事世忠願與張浚任之公無憂也浚因大犒浚世忠將士令世忠帥兵赴闕既而頤浩光世兵並至浚與之俱發平江上疏乞帝還即尊位苗劍大懼帥百官朝於睿聖宮四月帝復位以浚知樞密院事九月詔以周望爲淮浙宣撫使守平江陳思恭巨師古張浚魯旺李貴等悉隸節制望遣諸將各部所隸兵分護境內時河內降賊郭仲威領萬衆自通州屯虎邱山未幾聞建康失守杜充奔儀真帝幸明州於是平江大震望與郡守集耆艾士夫問計且曰今戰守皆已無策矣蓋其意在迎降而欲衆發其端士民不答望歛諸將兵歸城中慮其抗賊而取怒也而金人乃自建康經廣德湖州南過安吉十二月遂趨臨安渡錢塘降越州犯四明以窺行在望自謂虜不敢犯境而過始少安且倚郭仲威爲腹心張俊魯旺居城中巨師古控扼吳江李闍羅屯常熟陳思恭屯楞伽山兵無紀律村落間皆被其害而仲威既居城府外爲忠勇之論士民亦倚以重郊居之家往往復

入城中謂四圍渠塹深廣庫廩充物兵器犀利人人安之傳者多云賊州返建業或又謂自臨道宣歙趨當塗而歸望等素不嚴斥堠四境無衛四年正月方遣張俊陳思恭等統兵規入臨安以邀收復之功俊等行涉旬間道潛軍於湖州烏墩鎮以觀變二月十八日始馳報金人犯秀州崇德十九日徵鄉兵發太湖洞庭東西山船千艘命角頭巡檢楊舉總之抵吳江陣於簡村二十一日金人犯吳江巨師古兵不戰而潰更以太湖民舟爲向導歸於西山二十二日郭仲威遣兵拒守於尹山已而退師二十三日府中令民逐便出城留少壯者登埤以守是日金人游騎掠城東郭仲威兵未戰而返守臣湯東野出奔周望以郡印付仲威二十四日仲威會諸將飲城上士民老幼數萬叩頭出血請加守禦之備仲威奮語衆曰即發遣騎兵虜行破矣民慎無擾人猶信之日欲哺金人大集於城下仲威及魯珏兵火廣化寺又火醫官李世康家望與仲威等皆宵遁其下自城南轉劫居民北出齊門而避民之得出郭者多爲所害二十五日五漏未盡四刻金兵自

吳郡通典

三十九

盤門入劫掠官府民居子女金帛廩庫積聚縱火延燒煙焰見二三百里凡五晝夜三月朔乃出閘門士民得脫者十之二三遷避不及遭殺者十之六七一城殆盡諸將奔走潛伏外邑覘金人之去也競以兵還張俊至自崑山巨師古至自洞庭李崗羅魯珏郭仲威等至自常熟陳思恭至自烏墩仲威揭榜於市曰本軍已逐退金人收復城府十五日有詔周望等失守平江可發遣諸將兵往常州以北衝襲金人以功贖過方金人燒劫之餘又值仲威晝夜縱兵搜抉民有訪舊居者即執之窮問瘞藏之所民益冤憤是夏疾疫斗米逾五百錢有自賊中逃歸者多因餓或驟得食而死橫屍枕藉道路涇港不可勝計吳中非形勝所必爭即有戰事不至大虜自古喪亂未有如是之酷者也仲威出於寇盜荼毒最甚後爲眞揚鎮撫使在郡復不悛爲劉安世所擒縛送行在詔斬於平江府以謝百姓方平江戒嚴兩浙宣司參謀胡舜陟言於望曰樞密必欲守平江莫若移軍吳江據太湖之險吾軍以中軍振其前使諸將以小舟自太湖旁擊之可必勝望不主其議但

令召諸將議之諸將不從惟陳思恭善其言願爲先鋒自餘不從竟已及虜過平江思恭不稟望自以兵出太湖橫擊其尾虜舟乃中原係虜之民間兵至皆爲內應縱火焚舟幾虜四太子思恭雖勝望怒其專制竟不遷官紹興元年東南諸路郡國饑淮東京東西流民聚平江府常州者多殍死詔令振之是年大疫流尸無算二年八月五日長洲地震自西北來樹木皆搖動工部侍郎李擢言平江府東南有逃田湖浸相連滕岸久廢歲失四萬三千餘斛乞招誘流民疏導耕墾其不可即工者蠲其額又郡民之陷虜者棄田三萬六千餘頃皆掌以舊佃戶諸縣已立定租課許以二年歸業圭田瘠薄民以舊籍爲病願除其不可耕之田損其已定過多之額後皆次第行之此李椿年經界之議所本也三年地大震四年六月淫雨害稼七年正月辛未火十二年左司員外郎李椿年言經界不正十害一侵耕失稅二推割不行三衙門及坊場戶虛供抵當四鄉司走弄稅名五詭名寄產六兵火後稅籍不失爭訟日起七倚閣不實八州縣隱賦多公私俱困九豪猾戶

吳郡通典

四十

自陳詭籍不實十逃田稅偏重人無肯售經界正則害可轉爲利且言平江歲入昔七十萬斛有畸今按籍雖三十萬斛然實入纔二十萬斛耳詢之士人皆欺隱也望考按覈實自平江始然後施之天下則經界正而仁政行矣帝謂宰執曰椿年之論頗有條理秦檜曰其說簡易可行程克俊曰比年百姓避役止緣經界不正行之乃公私之利乃以椿年爲兩浙運副專委措置經界椿年條畫來上請先往平江諸縣俟其就緒即往諸州要在均平爲民除害如水鄉秋收後妄稱廢田者許人告陂塘塍埂之壞官按覆令各戶各鄉造粘基簿仍示民以賞罰開諭禁防靡不周盡吏取材者論如法椿年既至平江置經界局守臣周葵問之曰公今欲均賦耶或遂增賦也椿年曰何敢增稅葵曰苟不欲增何爲言本州七十萬斛椿年曰當用圖經三十萬斛爲準時謂椿年先自其家田上量起十四年椿年權戶部侍郎仍舊措置經界十二月以母憂罷兩浙運副王鈇權領之椿年去任有司稍罷其所施行者十七年椿年免喪還朝復言兩浙經界已畢者四十縣其未

行處若止令人戶結甲虛形勢之家倘有欺隱乞依圖畫造簿本所差官覆實先了而民無爭訟者推賞弛慢不職者劾奏皆從之十三年三月望大雪盈尺二十三年諫議大夫史才言浙西民田最廣而平時無甚害者太湖之利也近年瀕湖之地多爲軍下侵據累土增高長隄彌望名曰壩田旱則據之以溉而民田不沾其利水則遠近汎濫不得入湖而民田盡沒乞詔有司究治盡復太湖舊跡使軍民各安田疇利益從之二十八年七月大風雨潮溢數百里壞田廬三省言平江等府被水尤甚欲除下戶積欠擬令戶部開具有無侵損歲計上曰不須如此止令具數便於內庫撥還朕平時不安費內庫所積正欲備水旱本是民間錢卻爲民間用何所惜乃詔平江等府應日前積欠稅賦並蠲之大理寺丞周環言太湖沿江洩水之所惟白茆浦最大請勅有司相視開決詔令兩浙漕臣按視開濬二十九年正月庚申興工二月癸卯畢工支錢三十餘萬貫米十萬餘石知平江府陳正同請禁圍裹湖田戶部奏在法潞水之地謂衆公溉田者輒許人請佃承買

吳郡通典

四十一

并請佃承買人各以違制論乞下平江府明立界至約束人戶毋得占射圍裹有詔從之戶部提領官田所言應官戶勢家坐佔官田今依估承買詔各路提舉司督察欺隱申嚴賞罰尋兩浙轉運使奏申括平江省府田一十六萬六千七百二十八畝每畝納上供苗三斗三升六合計米三萬九千四十七石係民戶世業今若出賣便爲私田上輸二稅賠失上供歲額苗米乃止三十一年九月金主亮大舉南下十月帝下詔親征未幾亮爲其下所殺帝欲乘時肅清中原駕幸金陵撫師十二月壬子至平江府泊姑蘇館初金主命其尙書蘇保衡由海道窺二浙以浙西副總管李寶璽之寶駐兵平江守臣朱翌素與寶異朝議以吏部侍郎洪遵嘗薦寶乃命遵知平江時步帥李捧請斷吳江橋或議塹常熟福山以限敵騎者遵曰審爾是棄吳以西耶凡堂帖與監司符移皆留不行及寶以舟師搆膠西凡資糧器械舟楫皆遵供億寶成功而歸遵之助爲多及車駕至遵獻洞庭柑卻不受自是所過無入獻者衛士丐索無度他部隨與不饜至平江乃相告曰內翰在

此汝母復然遵言官拘舟船聚邊海縣募水手留民兵夾運河築烽臺徒費無益乃罷鎮江至臨安所置烽燧餘從之癸丑帝乘馬至平江府行宮甲寅次無錫殿中侍御史吳芾言知崑山縣應辦巡幸科擾民間銀器至多詔勒停永不與親民差遣孝宗隆興元年八月大風水是歲大饑二年七月平江等處大水浸城郭壞廬舍圩田軍學舟行虞市累日人溺死甚衆越月積陰苦雨水患益甚臣僚奏請疏濬三十六浦開掘圍田詔兩浙運判陳彌作相度措置彌作議擇宜先治者凡常熟崑山十浦仍以緩急先後施工合開圍田一十三所詔今知平江府沈度依狀開決用錢三十餘萬貫米九萬餘石乾道元年春平江等府大饑殍徙者不可勝計州縣爲糜食之沈度陳彌作言崑山常熟諸浦並通大海沙隨潮入今依舊招致闕額開江兵卒次第開濬不數月諸浦可以漸次通徹又用兵卒駕船遇潮退搖蕩隨之使沙泥隨潮退落不致停積實爲久利從之五年增置撩河軍兵專一管轄不許人戶佃種菱菱因而包圍隄岸六年五月大水監奏進院李結上蘇

吳郡通典

四十一

湖常秀治田三議詔令胡堅常相度以聞其後戶部以三議切當但工力浩瀚欲諭有田之家各依鄉例出錢米與租佃之人更相修築庶官無所費民不告勞從之淳熙二年六月兩浙轉運使姜誵奏開常熟諸浦而許浦最急有詔別議水軍統制馮湛知平江府陳峴奉詔措置自雉浦至許浦口浚塘築隄提舉薛元鼎又奏開運河五十四里三年大水六年三月發運使魏峻疏至和塘塘成垂百三十年至是大加修治又以港汊紛錯盜賊潛形鹽賈借經以萃淵藪於險隘之處立柵以防不能踰越富民出財助工二月而畢十一年戶十七萬三千四十二口二十九萬八千四百五方宣和盛時戶至四十餘中更狄難掃蕩流離城中幾於十室九空中興以來爲輔郡涵養生息而殷盛終不逮矣十二年八月有蟲聚於禾穗油灑之卽墮一夕大雨盡滌之光宗紹熙元年長洲彭華鄉麥秀四歧五年八月水甯宗慶元二年十二月吳縣金鵝鄉銅錢百萬自飛嘉定十年割崑山地置嘉定縣十六年正月兩浙運判耿秉言板帳錢額太重官民交病是法剝立經隔

已數十年物價有低昂戶口有息耗安可不隨時而加損乞今去其太甚立其中制於是常熟一縣每年與減一萬貫崑山吳江縣每年合與減發三千貫時又有經總制錢月椿錢諸名光宗登極從顏師魯奏悉予減汰惟月椿錢至是乃減蓋宋世之弊政也五月水害稼度宗咸淳七年饑帝顯德祐元年三月元巴延原作伯延兵自常州趨平江平江守潛說友先遁通判胡玉等以城降會張世傑軍至元兵引去八月以文天祥爲浙西江東制置使兼江西安撫大使知平江府十月巴延分兵東下陷常州天祥使尹玉救之不克平江大震會獨松關告急留夢炎劉宜中議棄平江趣天祥天祥意未決兩府劄至乃委印於通判王矩之時督府遣環衛王邦傑援常留平江因責邦傑以城守十二月天祥去平江未數日元兵來侵矩之邦傑開城迎降都人大駭議天祥棄平江天祥出兩府劄榜之朝天門衆始定其後天祥詣巴延軍講解留不遣索多原作坡嘗問曰何以去平江天祥曰有詔趨入衛問兵若干對曰五萬索多歎曰天也使丞相在平江必不降但累城內百

吳郡通典

四十三

姓耳元以府治爲江淮行省置浙西軍民宣撫司以孟古岱原作古歹范文虎行兩浙大都督事遣霽至修吳江長橋巴延發平江留至守長橋以別兵守平江至復官至浙西道都元帥有保障之功子孫世居吳江同里是年主客戶三十二萬九千六百三

吳郡通典備彙九

元世祖至元十三年三月巴延入臨安兩浙平頒詔新附府司州縣十二月改宣撫司爲平江路總管府置錄事司以治之領吳長洲崑山常熟吳江嘉定六縣十六年九月詔杭蘇嘉興三路辦課官吏月給食錢毋得額外多取分例二十一年二月徙江淮行省於杭州徙浙西宣慰司於平江省是時霖雨米價湧貴宣慰使史弼發米十萬石平價糶之而後聞於省省欲增其價弼曰吾不可失信寧輟我俸以足之省不能奪益發十萬石民得不饑二十三年六月蘇州多雨傷稼百姓艱食雷膺爲江南浙西提刑按察使請於朝發粟二十萬石振之江淮行省以發粟太多議存三之一膺曰宣布皇澤惠養窮困豈可效有司出納者之吝耶二十四年宣慰使朱清以水滂爲災諭上戶開濬自婁門導水由婁江以入於海水勢順下不致爲害二十五年四月尙書省臣言近以江淮饑命行省振之吏與富民因緣爲奸多不及於貧者今杭蘇湖秀四州復大水民鬻妻女易食請輟上供米

吳郡通典

四十四

二十萬石振之報可二十六年五月徙浙西提刑按察司於平江省二十七年戶四十六萬六千一百五十八口二百四十三萬三千七百二十八饑二十九年六月水三十年都省以水災命浙西宣慰使哈刺歹改譯等選知水利人吳儀張桂榮潘應武相視合修湖泖河港應置橋梁閘壩九十六處用夫近十三萬有奇凡三月而成都省參議張挺議所占湖田在宋皆田宋亡乃爲富戶所據合收糧米還官爲挑湖支用都堂然之即湖田開港三條闊約十餘丈及濬趙屯大浦二浦活疾湖流從此遂輟成宗元貞元年五月陞崑山常熟吳江嘉定四縣爲州凡陞州以戶爲差戶四五萬者爲下州五萬至十萬者爲中州下州官五員中州六員八月平江等路大水大德元年浙江行省平章政事徹爾元作濬吳淞江四月畢工二年立浙西都水監庸田使司於平江路專董修築田園疏濬河道三年六月水四年饑五年七月朔海溢颶風拔平江路治吳長州縣治皆起空中乃墮是年又水十年五月水害稼七月大風海溢漂民廬舍十月吳江大水明宗天歷元

年八月水沒民田二年吳江知州孫伯恭募鈔一千錠米一千餘石大修石塘以
巨石重築之爲水竇一百三十又三竇之上以巨石爲梁木橋亦易以石文宗至
順元年閏七月水二年十月吳江大風雨太湖溢漂沒廬舍孳畜千九百七十家
三年九月大水順帝至元元年六月乙亥罷江淮財賦總管府所管平江杭州集
慶三處提舉司以其事歸之有司至正元年命工部尙書禿魯等講究浙西水利
以知渠堰事繫路州正官銜初郡人周文英上書論三吳水利請差能官勸率富
戶照依捨糧振饑例令自備工食開濬河浦考其成效輕省者量行優敘功績重
大者優以一官激勸勉勵庶幾勞而無怨擾不及衆可免差夫動擾之弊中書是
其議時有重惜名爵之論遂不報至是復有以文英所論稟上者亦不果行八年
四月大水十二年四月廉訪使李特穆爾元本李謀於太守高履監郡六十修平江
城重啟胥門築壘開濠備極深廣方元定江南凡城池悉命夷堙雖設五門蕩無
防蔽是時兵起始詔天下繕完城郭凡五月而畢工十五年十二月張士誠遣弟

吳郡通典

四十五

士德山通州渡江入福山港陷常熟士誠泰州白駒場亭人以操舟運鹽爲業緣
私作奸利頗輕財好施得羣輩心初起兵襲據高郵有衆萬餘自稱誠王僭號大
周建元天祐江陰人朱定爲盜元兵捕之急奔士誠求救具言吳中富庶可以建
國至是淮東饑遂謀南徙十六年二月士德陷平江湖州松江常州諸路改平江
路曰隆平府士誠自高郵來居之即承天寺爲府第設學士員開宏文館以陰陽
術人李行素爲丞相弟士德爲平章提調各郡兵馬蔣輝爲右丞居內省理庶務
潘元明爲左丞鎮吳興史炳文爲樞密院同知鎮松江郡州縣正官郡稱太守州
稱通守縣仍曰尹郡同知稱府丞知事曰從事餘則損益而已六月明太祖遣楊
憲通好於士誠其書曰昔隗囂稱雄於天水今足下擅號於姑蘇事勢相等吾深
爲足下喜睦鄰守境古人所貴竊甚慕焉自今信使往來毋惑讒言以生邊釁士
誠得書留憲不報七月士誠以舟師攻鎮江徐達敗之於龍潭復與湯和以計敗
之於常州乃以書求和請歲輸金粟太祖答書責其歸楊憲歲輸粟五十萬石士

誠復不報十七年三月徐達破常州湯和守之常與士誠接境間諜百出防禦嚴密敵莫能窺五月士誠寇長安州敗走六月吳良敗士誠於秦望山遂克江陰時士誠據全吳兵食饒足江陰當其要衝枕大江扼南北襟喉士誠數以金帛啗將士窺釁太祖諭良曰江陰我東南屏蔽汝約束士卒毋外交母納逋逃毋貪小利毋與爭鋒惟保境安民而已俞通海以舟師略太湖降士誠守將於馬磧山七月徐達徇宜興使趙德勝取常熟士德迎戰被擒士德善戰有謀能得士心明祖欲留之以招士誠士德間道貽士誠書俾降元士誠計決江浙右丞相達實特穆爾原和諱爲言於朝授太尉雖去僞號擅甲兵土地如故士德竟不食死是年復降平府曰平江路十八年五月士誠遣史文炳襲殺楊完者遂有杭州十月徐達邵榮攻太湖口遂有宜興廖永安乘勝深入太湖爲士誠將呂珍所執不屈死十九年正月士誠大舉兵寇江陰敗走復寇建德李文忠大破之奄至常州吳良遣兵從間道殲其援師士誠奪氣元帝徵糧於士誠賜之龍衣御酒士誠自海道輸糧

吳郡通典

四十六

十一萬石於大都歲以爲常甯海人葉兌獻書明祖略謂張九四之地南包杭紹北跨通泰而以平江爲巢穴今欲攻之莫若聲言掩取杭紹湖秀而大兵直擣平江城固難以驟拔則以鎖城法困之於城外矢石不到之地別築長圍分命將卒四面立營屯田固守斷其出入之路分兵略定屬邑收其稅糧以贍軍中彼坐守空城安得不困平江既下巢穴已傾杭越必歸餘郡解體此上計也張氏重鎮在紹興懸隔江海所以數攻而不克者以彼糧道在三江斗門也若一軍攻平江斷其糧道一軍攻杭州絕其援兵紹興必拔所攻在蘇杭所取在紹興所謂多方以誤之者也紹興既拔杭城勢孤湖秀風靡然後進攻平江犁其腹心江北餘孽隨而瓦解此次計也明祖納之二十三年二月呂珍圍安豐韓林兒告急明祖曰安豐破則士城益疆不可不救也自將往安豐城已破嚴兵拒守左右皆敗常遇春橫擊其陳三戰三破之珍走俘獲士馬無算時士誠益驕令其下頌功德邀王爵元帝不許遂自立爲吳王尊其母曹氏爲王太妃置官屬別治府第於城中以士

信爲浙江行省右丞相幽達實特穆爾於嘉興元徵糧不復與是時士誠所據南抵紹興北踰徐州達於濟寧之金溝西距汝潁濠泗東薄海二千餘里帶甲數十萬以弟士信及女夫潘元紹爲腹心左丞徐義李伯昇呂珍爲爪牙參軍黃敬夫蔡彥文葉德新主謀議元學士陳基右丞饒介典文章又好招延賓客贈遺輿馬居室什器甚具爲人遲重寡言似有器量而實無遠圖既據吳中吳承平久戶口殷盛漸奢縱怠於政事士信元紹尤好聚斂日夜歌舞爲樂將帥亦偃蹇不用命每有攻戰輒稱疾邀官爵田宅然後起甫至軍所載婢妾樂器踵相接或大會游談之士樽蒲蹴鞠皆不以軍務爲意及喪師失地還士誠概置不問是以吳人知其必敗明祖稱士誠多奸謀尙間諜御衆無紀律良然二十四年九月士信大發兵攻長興耿炳文屢敗之長興爲士誠必爭地炳文拒守十年迄不得逞時白茆鹽鐵塘爲蘆葦所塞涓流不通士誠閱故牘得周文英所論乃起兵民夫十萬以芝塘爲行府駐節三涇口命呂珍督濬塹其地爲港由是水勢峻下數年得免浸

吳郡通典

四十七

濠特爲法甚厲民多愁怨惟華亭縣丞盛彥忠奉檄趨事撫民獨至輿誦喧傳二十五年十月明祖平淮北地平江連歲大水民多饑饉二十六年八月明祖遣徐達常遇春率舟師二十萬討士誠御戟門誓師曰城下之日毋殺掠毋毀廬舍毋發邱壟士誠母葬平江城外母侵毀既而召問達遇春用兵當何先遇春欲直擣平江太祖曰湖州張天麒杭州潘原明爲士誠臂指平江窮蹙必將悉力赴援難以取勝不若先攻湖州使疲於奔命羽翼既披平江勢孤立破矣遂移檄數士誠八罪大兵自太湖圍湖州復令李文忠攻杭州以牽制之士誠遣朱暹五太子等以十萬衆來援屯於舊館出明軍後築五砦自圍遇春將奇兵更出其後築十壘以遮之士誠來援敗於阜林遇春等又敗徐志堅於東阡襲徐義於平望盡燔其赤龍船十月又敗潘元紹於烏鎮五太子朱暹呂珍皆降徇於湖州十一月張天麒等以湖州降華雲龍攻嘉興守將宋興降湯和克太湖水寨下吳江州戰於尹山橋盡覆敵衆徐達進圍平江達軍葑門遇春軍虎邱郭子興軍婁門華雲龍軍

胥門湯和軍閫門王弼軍盤門張溫軍西門康茂才軍北門耿炳文軍城東北仇成軍城西南何文輝軍城西北築長圍困之架木塔與城中浮圖等別築臺三成瞰城中置弓弩火筒臺上又置巨礮所擊輒糜碎城中大震二十七年太祖吳元年也士誠拒守久太祖貽書招之曰古之豪傑以畏天順民爲賢全身保族爲智漢竇融宋錢俶是也爾宜三思勿自取夷滅爲天下笑士誠不報六月士誠親帥銳士突圍出西門搏戰將奔常遇春軍遇春分兵北濠絕其後而別遣兵與戰士誠軍殊死鬪王弼馳騎奮擊敵小卻遇春帥衆乘之士誠兵大敗人馬溺死沙盆潭者甚衆士誠故有勇勝軍號十條龍者皆驍猛善鬪每被銀鎧錦衣出入陣中至是亦敗墮萬里橋下死士誠馬逸墮水幾不救肩輿入城自是不敢復出李伯昇知士誠困甚遣所善客踰城說之曰始公所恃者湖州嘉興杭州耳今皆失矣獨守此城恐變從中起公欲死不可得也莫若順天命遣使金陵稱公所以歸義救民之意開城門幅巾待命當不失萬戶侯且公之地譬如博者得人之物而復

吳郡通典

四十八

失之於公何損士誠仰觀良久曰吾將思之乃謝客竟不降九月平江圍急士誠中礮死城中洶洶無固志士誠語其妻劉氏曰吾敗且死若曹何爲劉曰君無憂妾必不負君城將破達與遇春約曰師入我營其左公營其右又令將士曰掠民財者死毀民居者死離營二十里者死辛巳諸將破葑門遇春破閫門入士誠收餘衆戰於萬壽寺東街衆散走倉皇歸府第拒戶自縊故部將趙世雄解之達數遣李伯昇潘元紹等諭意士誠瞑目不答昇出葑門劉氏積薪齊雲樓下驅羣妾登樓令養子辰保縱火焚之亦自縊有二幼子匿民間不知所終吳地平民安堵如故改平江路曰蘇州府吳良自江陰移守之士誠至舟中不復食至應天竟自縊死命具棺葬之方平江被圍城內多列礮石王行私語所知曰兵法柔能制剛若植大竹於地繫布其端礮石至布隨之低昂則人不能害而礮石無所用矣及遇春等克平江果如所言自士誠起兵至是凡十四年

吳郡通典備彙十

明太祖洪武元年初定天下官民田賦凡官田畝稅五升三合民田減二升重租田八升五合五勺沒官田一斗二升惟蘇州諸府怒其爲張士誠守盡籍其功臣子弟莊田入官後惡富民豪並坐罪沒入田產皆謂之官田按私家租簿爲稅額而蘇州視他府尤重其後連年水災雖議蠲緩而重額不改二年以元所陞崑山常熟吳江嘉定四州仍爲縣三年六月徙蘇州等府無業民田臨濠四年蘇州府戶四十七萬三千八百六十二口一百九十四萬七千八百七十一六年饑八年十二月水是年以揚州府之崇明縣改屬蘇州九年戶五十萬六千五百四十三口二百一十六萬四百六十三十一年七月海溢人多溺死十三年三月始減蘇州諸府重賦額畝科七斗五升至四斗四升者減十之二四斗三升至三斗六升者俱止徵三斗五升以下者仍舊時蘇州府秋糧二百七十四萬六千餘石歲額與浙江通省埒其重如此十七年正月用方鳴謙策命湯和與鳴謙巡視海上始

吳郡通典

四十九

築山東江南北浙東西沿海諸城以禦倭寇二十六年戶四十九萬一千五百一十四口二百三十五萬五千三十惠帝建文二年二月詔曰國家有惟正之供而江浙賦獨重蘇松官田準私租起科特以懲一時頑民豈可爲定則以重困一方宜悉與減免畝不得過一斗行之未久成祖盡革建文之政而賦額復重三年三月黃子澄微服由太湖至蘇州與知府姚善倡義勤王初太祖以吳俗奢僭欲重繩以法黠者更持短長相攻訐善爲政持大體不爲苛細訟遂衰息吳中大治好折節下士敬禮隱士錢芹王賓韓奕俞貞木輩以月朔會學宮迎芹上坐請質經義芹曰此非今所急也善悚然起問芹乃授以一冊視之皆守禦策時燕兵已南下密結嘉松鎮常四郡守練民兵爲備薦芹於朝著行軍斷事四年五月善應召至京師上言子澄才足捍難不宜棄閑遠以快敵人遂召子澄及齊泰還命善兼督蘇松常鎮嘉興五府兵勤王兵未集燕王已入京師子澄匿善所約共航海起兵善謝曰公朝臣當行政兵圖收復善守土與城存亡耳子澄去善爲麾下縛獻

不屈死成祖永樂元年四月以蘇松嘉湖連年大水命戶部尚書夏原吉治之以侍郎李文郁爲之副復使僉都御史俞士吉賚水利書賜之原吉請循禹三江入海故蹟濬吳淞江下流上接太湖而度地爲閘以時蓄洩役十餘萬人布衣徒步日夜經畫不輟八月徙直隸蘇州等十郡浙江等九省富民實北京二年正月夏原吉言蘇松水雖由故道入海而支流未盡疏洩非經久計乃命復濬白茆塘劉家河大黃浦以大理少卿袁復陝西參政宋性副之九月畢工農田大利三年六月蘇州等府大饑命原吉等往振發粟三十萬石給牛種尋又命姚廣孝往廣孝至長洲候同產姊姊不納訪其友王賓賓亦不見遙語曰和尚誤矣和尚誤矣復往見姊姊嘗之廣孝以所賜金帛散宗族鄉人而還有請召民佃水退淤田益賦者原吉馳疏止之廣孝至稱原吉曰古之遺愛也十三年旱從吳江縣丞李昇言濬太湖下流諸河港宣宗宣德三年中書舍人陸伯倫言常熟七浦塘東西百里灌常熟崑山田歲租二十餘萬石乞聽民自濬詔可五年五月帝以知府多不稱

吳郡通典

五十

職會蘇州等九府缺員皆雄劇地用尚書蹇義胡濙等薦以禮部郎中况鍾知蘇州府鍾剛正廉潔勤政愛民初視事佯不省察羣謂太守闇可欺越日悉抉其隱捶殺姦吏舞文者數人盡斥屬僚之貪虐庸懦者一府大震乃獨煩苛立條教事不便民者立上書言之帝悉報許興利除害不遺餘力鋤豪強植良善民奉之若神當是時屢詔減蘇松浮糧適巡撫周忱繼至相與曲算累月減至七十二萬餘石他府以次減免忱爲政簡易而立法周密帝知其才可大用以工部右侍郎巡撫江南諸府總督稅糧乃定加耗折徵之例糶平米法革糧長之弊置濟農倉終忱之任江南民不知荒兩稅未嘗逋負皆其效也其與陳瑄議漕運多所更定經理江南水利功效最著凡忱所爲善政鍾皆佐之而松江知府趙豫常州知府莫愚等亦推心諮畫既久任與吏民習若家人父子前後官吳中者莫之能及吳氏立祠尸祝迄今弗衰九年毀蘇松民私築隄堰英宗正統元年海溢常熟傷禾四年七月大風拔木殺稼八月水溺死甚衆七年七月颶風大水濬沿海諸河九年

春饑景帝景泰五年正月大雪連四旬凍餓死者無算時年饑多盜貧民掠富家粟火其居蹈海避罪王文捕許師道等二百餘人張其功坐以謀逆大理寺卿薛瑄力辯其誣給事中王鎮因乞會廷臣勘實六月誅師道等十六人餘得釋七月大水九月免蘇州等七府漕糧二百餘萬石十一月罷蘇松常鎮織造採辦六年春饑英宗天順四年二月崔恭巡撫蘇松大治吳淞江起崑山夏界口至上海白鶴江又起嘉定卞家渡迄莊家涇凡濬萬四千二百餘丈又濬曹家港浦匯塘諸水賴其利名曹家港曰都堂浦五年七月海溢崑山人溺死甚衆憲宗成化三年正月詔加蘇州知府邢宥浙江左參政仍理府事先是蘇州大水民饑宥不待奏輒發米二十萬斛以振宥素廉介治蘇嚴而不苛巡撫宋傑薦於朝因有是命八年常熟麥秀兩歧十四年詔巡撫都御史牟俸兼領蘇松水利孝宗弘治元年十二月常熟虞山鳴四年八月水是年蘇州府戶五十三萬五千四百九口二百四萬八千九十七七年九月海溢平地水五尺沿江者一丈民多溺死停蘇松諸府

吳郡通典

五十一

所辦物料留關鈔戶鹽備振命工部侍郎徐貫巡撫副都御史何鑑經理南畿水利貫以主事祝萃日隨萃乘小舟究悉源委乃濬吳江長橋導太湖散入澱山陽城昆承諸湖復開吳淞江並大石趙屯諸浦洩澱山湖水由吳淞江口以入於海開白茆港白魚洪鮎魚口洩昆城湖水由白茆港以注於江開斜堰七舖鹽鐵等塘洩陽城湖水由七了港以達於海於是開湖州之淩涇洩西湖天目安吉諸山之水自西南入於太湖開常州之百瀆洩漂陽鎮江練湖之水自西北入於太湖又開諸陡門洩漕河之水由江陰以入於大江八年四月工成萃之功爲多九年提督水利工部主事姚文灝以沙湖風浪甚惡且多盜賊傍湖築夾隄橫截其中閱二歲餘文灝以疾去郎中傅潮來任始成之十年正月置太倉州於太倉衛城析蘇州府崑山常熟嘉定三縣地益之十六年旱十七年五月罷蘇杭織造中官十八年九月甲午地震十九年中官王敬挾妖人千戶王臣南行採藥物珍玩所至騷然長吏多被辱至蘇州召諸生寫妖書諸生大譁敬奏諸生抗命巡撫王恕

疏言當此凶歲宜遣使振濟願乃橫索玩好因盡列敬罪狀會中官尙銘亦發敬
姦乃下敬獄戍其黨十九人而棄臣市武宗正德元年減蘇杭織造歲幣四年飢
五年十一月大水城中街路皆斷不通吳江垂虹橋有水則碑二是時猶存其橫
第六道刻大宋淳熙三年水到此第七道刻大元至元二十四年水到此因往稽
之水到六則與淳熙時同七年旱十二年大雨殺麥禾十三年五月大雨溺室廬
屋宇無算癸丑常熟俞野村迅雷震電有白龍一黑龍二並乘雲口吐火目睛若
炬撤民居三百餘家吸二十餘舟於空中舟人墜地多怖死是夕雨如注色赤五
日乃止歲饑世宗嘉靖元年九月以工部郎中林文憲顏如環協理蘇松水道初
李充嗣建議修治武宗進充嗣工部尙書兼領水利事及帝嗣位復令文憲等與
充嗣畫水爲井地示開鑿法戶占一區刻日計工造濬川爬用巨篋數百曳木齒
隨潮進退擊汰泥沙置小艇百餘尾鐵帶以導之開白茆港疏吳淞江濬故道穿
新渠凡六閱月而迄工巨浦支流罔不灌注二年八月大水四年二月長洲知縣

吳郡通典

五十二

郭波以事挫織造中官張志聰志聰伺波出倒曳之車後典史蕭景腆操兵教場
急帥兵救之百姓登屋飛瓦擊志聰志聰奏逮波景腆吳廷舉亦具奏志聰貪黷
狀帝乃降波五級調景腆遠方志聰亦召還九年旱十一年大理寺左丞周鳳鳴
條上吳中水利曰復專官以圖責成曰疏海口以導下流曰濬支河以修圩岸曰
虛長橋以決壅滯曰均夫役以便貧民曰禁侵占以飭豪右凡六事二十四年正
月應天巡按御史呂光洵又奏蘇州水利四事曰廣疏濬以備蓄洩曰復版閘以
防淤澱曰量緩急以處工費曰重委任以責成功又請治田園言多切當三十二
年閏三月汪直句諸倭大舉入寇連艦數百蔽海而至浙東西江南北瀕海數千
里同時告警蘇州同知任環禦賊寶山洋奮前搏戰相持數日始遁去四月又犯
太倉環即馳赴遇賊短兵接環身被三創裹創擊賊怒濤作操舟者失色環意氣
彌厲竟敗賊俘斬百餘八月賊劫金山衛及嘉定犯常熟知縣王鐵禦卻之初鐵
之官海濱多大猾匿亡命作姦鐵悉貫其罪語之曰何以報我咸請效死乃立者

長部習子弟得數百人合防卒訓練縣無城帥士卒城之至是遂得力三十三年正月賊自太倉掠蘇州四月犯常熟圍崑山五月賊薄蘇州城閉鄉民繞城號任環盡納之全活數萬計副將解明道擊敗之六月賊自吳江嘉興還屯柘林八月犯嘉定敗之三十四年三月倭自三丈浦分掠常熟江陰任環與王鐵等破之於南沙倭遁四月犯金山五月總督侍郎張經副總兵俞大猷擊賊於王江涇大破之大猷及任環復敗倭於陸涇壩又敗之鶯脰湖王鐵與里居參政錢泮追倭於上滄港遇伏死任環俞大猷追敗之三丈浦又敗之於馬蹟山禽其魁金涇許浦白茆港賊俱出海大猷追及於茶山焚五舟賊大敗八月倭在溧水者流劫溧陽宜興聞官兵由太湖出一晝夜奔八十餘里越武進至無錫駐惠山進至潞墅巡撫曹邦輔擊敗之賊走太湖追之楊林橋盡殲其衆方蘇州倭警募壯士爲備後兵罷無所歸羣聚剽奪巡撫翁大立得其主名捕甚急惡少懼夜劫縣衛獄縱囚自隨攻都御史行署大立帥妻子遁知府王道行督兵力拒之乃斬葑門奔入太

吳郡通典

五十三

湖三十八年十一月事聞命大立戴罪捕賊尋劾罷是歲旱參政凌雲翼專設御史督蘇松水利詔以巡鹽御史蔚元康兼之元康議重濬常熟太倉嘉定諸浦塘次第施工穆宗隆慶元年大饑二年三月詔遣中官李佑督蘇杭織造雷禮等執奏不從郝杰言登極詔書罷織造甫一年敕使復遣非畫一之政啟內臣專恣有司剝下奉之損聖德非小帝終不聽三年六月以海瑞爲右僉御史巡撫應天十府屬吏憚其威者多自免去有勢家朱丹其門聞瑞至勦之中官監織造者爲減儀從瑞銳意興革請濬吳淞白茆民賴其利素疾大戶兼并力摧豪強撫窮弱貧民田入於富室者率奪還之下令飢發凌厲所司惴惴奉行豪有力者至竄他郡以避姦民乘間告訐故家大姓時有被誣負屈者由是怨頗興爲臺司所劾改督南京糧儲未之任又爲忌者所沮謝病歸瑞撫吳甫半歲民間其去號泣載道家續像祀之神宗萬曆三年九月水四年六月復遣內臣督蘇杭織造七月巡撫應天都御史宋儀望條上三吳水利請復專官章下部議儀望初知吳縣民輸白糧

京師輒破家儀望合諸區各出公田計役授田贍之其他惠績甚著用張居正薦擢官奏減屬郡災賦海警稍定將吏諱言兵儀望與副使王叔杲修戰備倭果至禦之黑水洋甚有斬獲五年六月大雨寒如冬傷稼六年九月詔蘇州諸府開墾荒田六年後起科是年戶六十萬七百五十五口二百一萬一千九百八十五七年大水十年二月張居正言昨應天巡按御史孫光祜請蠲蘇松兩府未完帶徵錢糧七十餘萬戶部以國計所關未敢擅議竊謂德惠當出朝廷與其股民以實奸貪之橐孰若盡蠲之以施曠蕩之恩乞諭戶部覈萬歷七年以前逋賦悉行蠲免從之七月海溢壞田禾人溺死甚衆十月大水蠲振有差十四年冬木冰十五年五月淫雨傷麥禾十六年至十七年連歲大旱太湖爲陸地以災傷停減蘇杭織造十九年六月水七月海溢二十四年十月始命中官權稅通州自後各省皆設稅使以孫隆領蘇杭稅使二十九年五月淫雨傷麥蘇杭織造兼權稅太監孫隆激蘇州民變殺參隨數人徧焚諸札委稅官家隆急走杭州以避有司捕亂者

吳郡通典

五十四

葛誠獨承論死三十二年三月蘇州稅監劉成以水災請暫停米稅帝以歲額六萬米稅居半不當盡停令以四萬爲額趙世卿言鄉者旣免米稅旋復再征已失大信於天下今成欲免稅額之半而陛下不盡從豈惻隱一念貂璫尙存而陛下反漠然不動心乎不報熹宗天啟六年二月魏忠賢分遣緹騎逮周順昌等初魏大中之被逮也過蘇州順昌方以吏部員外郎家居聞大中至出餞與同臥起者三日許以女字大中孫旂尉屢趣行順昌瞋目曰若不知世間有不畏死男子耶歸語忠賢我故吏部郎周順昌也因戟手呼忠賢名罵不絕口會吳中訛言黃尊素欲效楊一清誅劉瑾故事用蘇杭織造太監李實爲張永授以私計忠賢大懼遣刺事者至吳中凡四輩因誣故蘇松巡撫周起元乾沒帑金十餘萬日與尊素及繆昌期等往來講學因行居間詞連順昌蘇州士民素德順昌緹騎至衆咸憤怒號冤者塞道比開讀不期而集者數萬人咸執香爲周吏部乞命諸生文震亨等謁巡撫毛一鷺巡按御史徐吉請以民情上聞旂尉厲聲罵曰東廠逮人鼠輩

敢爾大呼囚安在手擲琅璫於地聲琅然衆益憤曰始吾以爲天子命乃東廠耶
豈擁大呼勢如山崩擊斃旂尉一人餘負傷踰垣走一鷺吉不能語知府寇愼吳
縣知縣陳文瑞素得民曲爲解諭衆始散順昌自詣吏一鷺飛章告變言吳人盡
反謀斷水道劫糧舟忠賢大懼旣而一鷺縛得倡亂者顏佩章馬傑沈揚楊念如
周文元等論斬亂已定忠賢乃安然嗣是緹騎不出國門矣順昌旣下獄爲許顯
純所鍛鍊楚毒備至六月十七日斃之獄蘇州諸生朱祖文力爲營護卒不免順
昌襯歸祖文哀慟發病死九月周起元亦斃於獄吳士民及其鄉人無不垂涕者
佩章等皆市人文元則順昌輿隸也臨刑五人延頸就刃語寇愼曰公好官知我
等好義非亂也監司張孝流涕而斬之吳人感其義合葬之虎邱旁題曰五人之
墓其地即一鷺所建忠賢普惠祠址也七年太湖溢入吳江簡村漂溺千餘家莊
烈帝崇禎元年逆阹伏誅贈順昌太常寺卿給廕諡建祠賜額順昌子茂蘭以父
讎未報刺指血上疏其貼黃曰爲孤忠已被恩褒沈寃尙未剖晰特搏額號天懇

吳郡通典

五十五

報父讎以彰國法事臣父忤璫慘死皆緣倪文煥謀之於內毛一鷺因而謀之於
外殺人抵死律有明條而文煥鼎湖勸進一鷺亦嘗建祠媚璫尤祖法所不赦伏
乞敕下部院將提到倪文煥即刻處決已故毛一鷺還行褫戮庶父冤得雪國法
亦伸疏成姚希孟閱之謂鼎湖勸進語非所宜言茂蘭復刺舌血再書以進又疏
請給三代誥命帝悉報可且命後先慘死諸臣咸視此例五年吳縣戶十萬九百
六十九口六萬五千六百十口數反縮於戶是時海寇兵荒非死則徙而戶籍尙
仍其舊也

吳郡通典

卷五十五